


Kodak Color Control Patches



如臯縣續志卷七

名宦

才有大小位有階次靖獻鞠躬為臣子所當自致勸賞刑威不辭勞瘁休養生息功在百世前事者後事之師允宜式型勿替續名宦

范仕義字廉泉滇人以甲戌進士合臯多善政挑龍遊河濬護城河建南閘續修縣志捕蝗收蝻皆悉心經畫為人寬平仁恕與民不擾民德之呼為佛子及再任臯臯民撰楹聯有士民皆慰望父母喜來歸之頌政暇與邑人士唱酬若三台山碧霞山諸勝水木清華冠蓋觴詠殆無虛日補水繪園修禊湯兩生都督為之繪圖精射

工奕尤善擘窠書有歐蘇之遺風焉後知通州著有廉
 泉詩鈔四卷北上留別云匏繫蟻山已十年慚無善政
 計安全名場自笑微才拙輿論難當眾母賢波映綠楊
 搖祖帳風翻紅藥動離筵 帝城雙闕卿雲擁翹首
 龍光尺五天

白聯元字海峯山西人以進士合臯治吏胥極嚴聽訟明
 敏杜絕苞苴時安定書院歲久法敝文風湮鬱歲課一
 次循故事而已公力振刷按月甄別廣名額益膏火士
 一見即識其姓名暇復延入署從容講藝情意優渥士
 氣大振去之日諸生立棠蔭碑以誌去思至今掇科第
 者多自書院中出公倡之也性嗜吟詠惜多散佚存贈

邑人嚴瀛壽詩云不慕仙方慕義方靈椿丹桂共稱揚
 趨庭學禮聲名遠閉戶傳經歲月長定有高才依絳帳
 仍推令德荷青箱雉臯從此添佳話羨煞燕山竇十郎
 十年前已慕芳聲又篤賢郎問字情鸚薦連番虛夾袋
 鹿鳴高賦佐稱觥傳家政績南邦頌魯甫香南公任壽
 世文章北斗名拙宦自憐雙鬢白登堂還擬會耆英

陳敦誥字聽漁浙江人以舉人署臯事性伉爽明決甫下
 車見訟案山積歎曰民以農為本今為訟累無論事曲
 直本務荒矣且吏胥眈眈視正樂有此輩耳糜金錢飽
 私橐何為乃日理塵牘兩月間共結六百餘案人皆悅
 服循聲卓著惜未久旋調去

馬雲鶴字于臯滇人以進士合臯性寬厚訥然有長者風時江南用兵楚人歐龍光僞託營員蓄意茲亂公捕治之民始安堵論文有歸唐家法甄拔多雋才子汝弼江蘇候補同知

李守誠字次庄江西人以舉人授六合縣攝臯篆臯民素脆弱不任勞苦公爲政務持大體與民休息民有爭訟隨時審斷不爲滋蔓檄赴六合時當賊衝勢危甚臯人謀留公公不可曰吾畏難不往誰當往者竟驅車去去之日士民焚香餞送公亦惓惓不忍別旣蒞任固守數年城陷公殉焉蓋公當去臯時已決志矣事聞奉

旨立祠春秋致祭卹贈知府銜臯人爲位以祭邑人錢士杓作祭

文云嗚乎生留遺愛循良蜚百里之聲死作國殤保障重萬夫之時維我次生先生人如佛子邑號神君灑車邊之甘雨四野桑麻揚扇底之仁風滿城桃李乃始以實授六合而權攝茲邦繼卽罷任如臯而往蒞厥邑敵壓壘橫城餘斗大臯之人截鞚而留攀車而哭慈雲不能留久覆之陰圓月不能返將沈之魄然猶謂慷慨運籌從容却敵苟其寄干城而有奏功之日亦可捧露布而慰銜感之心夫何一介星馳千家雨泣慟讀徵兵之檄響逐悲風追思餞別之筵顏愁落月一城血肉飄零弓劍之遺滿目山河沈鬱風雲之氣嗚乎痛哉始公大智不驚深仁若怯雖侃侃握司牧之權仍恂恂若書生

之色豈知參天松柏歲寒而節操始彰空谷芝蘭火熱而芬芳彌烈寸心不泯先軫之面如生此虜未除卞壺之拳猶握嗟嗟襄樊孔棘魂銷葛嶺笙歌巡遠已危血染賀蘭杯酒在先生仁至義盡死有餘榮而某等公憤私情生同此恨一束奠芻九歌獻曲赤城霞起疑來英毅之魂滄海波深不盡軍民之淚哀哉尙饗

上官夔字子峯陝西人以舉人令臯性峭刻爲政尙嚴吏民畏之時江南賊氛未靖夔分設保衛招集流亡宵小斂跡民賴以無恐捐廩爲膏火資士以此多之爲立德政碑於書院

李振翬字義琴安徽舒城人以舉人署臯事下車時卽疏

通市河平減米價爲人寬厚和平每有訟案不恃桁楊理論情遣無留獄尤嘉惠士林接見時以勤學立品爲訓在任三年士人公立德教碑於書院留別詩云頻年鴻爪此淹留瓜代人來值暮秋得失久拚蕉下鹿去來略似水中鷗難追往哲徵三異且效前賢賦四休儻遂歸心依子舍天倫樂事勝封侯自慚荒落謬論文多士如林總不羣幾見鸞凰棲枳棘卽看鷓鴣奮風雲當前進步須爭寸以後光陰要惜分從古偉人三不朽一生心力祇精勤議蠲議賑歲頻仍行止胥難惕履冰民困但期兵不用風醑恰稱吏無能思家苦類焚巢鳥賃廡甘爲退院僧獨坐垂簾無一事夜闌還伴讀書燈魯多

君子繫離思欲理行裝意轉遲好景探從無事日高情
見在去官時未能教養慚民母幸有仁賢足我師且借
一枝聊小任當筵滿罄手中卮邑人多屬和焉

劉承廉字貞臣福建人豐利場大使鹽法久疲玩承廉釐
剔奸弊濬市河修范隄百廢俱舉性尤慈惠創建保嬰
局冬時施衣賑粥除夕微行貧苦者陰伙助之居官七
年無疾終民皆感泣列主以祀焉


項徽字杏樵歙人嘉慶辛酉舉人大挑改教職補臯學訓
導履任後於

聖廟多所整治雅好吟詠與邑令范仕義及臯人士唱酬工六
書旁及金石尤精鑑賞所獲名書畫皆手自標題陞淮

安教授丁母憂復遊臯主講書院服闋任甯國教授旋
卒年七十一著有黃山遊草雙蓮花館詩鈔

吳鎧字梅孫儀徵人乙酉舉人主講書院工書善詩與邑
令范仕義詩酒唱酬疏爽雋雅立身在仕隱之間一時
名士多與之遊

李家彬字濟之秣陵人優附生署教諭主講書院性謙沖
好獎予後進立品超卓非公不至有合甫下車以邑中
殷富問公不對人益以是重公及卒貧無以斂邑人助
之始歸葬書法規撫褚王間亦出入松雪思白間人多
有藏其墨蹟者



如臯縣續志卷八

列傳一 孝友 忠烈 文苑

天壤菁英惟忠孝與節義標準式於人倫根秉彝之深粹潛德幽光瞻奇仰異續列傳

孝友

葛魁元字葵原國學生少孤事母孝承顏悅志數十年如一日先世墓自宋失考祈夢呂仙祠仙示以問諸水濱而已六字後見舊譜知在潤州郭公墓側乃買棹艤山麓四顧蒼茫不知所在魁元焚香默禱誓不空回恍惚間波浪頓豁現示兩墓在叢葦中去郭公墓約三十丈歸圖諸譜兄明元早故嫂洪氏守志代為請

旌邑人創建繼善堂竭力襄辦他若修城濬濠賑飢恤接皆
倡捐助焉道光二十五年

旌

叢能字簡齋國學生居叢家壩六歲失恃繼母朱撫之成
立時祖母九旬患風疾隨父日侍左右祖母思梨寬百
里外得之父教嚴趨庭無稍怠父每遠歸風雨黃昏數
里相迎父患膈疾躬親湯藥衣不解帶者數月疾篤顛
天減算以益親壽事後母五十餘年依依孺慕孝養備
至嘗曰吾幼不得事母遂母後母然吾知為母不知為
後母也比後母歿年八十能年六十一矣以不得終事
母為恨易戚中禮鄰里動容生平好矜恤嚴取與年七

十四卒里人臚其事呈請

旌表子二蔭晨蔭恩

張咸臨張廷育遺腹子母閻氏年二十一撫之成立咸臨
天性純孝幼侍重慈得歡心祖母朱寢疾衣不解帶者
累月及卒毀幾滅性母諭之稍進勺飲母歿哀號目流
血見者無不欷歔葬畢即為母請

旌建坊逢家忌啜泣竟日年八十二卒里人呈請

旌表子重光瑤光監生嵐光庠生

薛雲松居薛家莊性孝友事親不辭勞瘁家雖貧供甘旨
無缺生事葬祭一以誠敬親歿廬墓歲時致饗泣下沾
襟天資英敏不欲進取違色養援例入成均壽九十四

里人呈請

旌表建坊縣城范家橋北子岑捐職都司金華定山武生

胡聯慶字賡廷甲子副貢希曾孫也幼穎敏讀書香山侍御城南書塾天性孝友風裁峻整咸豐初元特開辛亥制科舉孝廉方正

廷試第二特用州同分發浙江旋署甯波水利通判省城遭兵燹聯慶襄辦軍務以軍功加同知署理餘杭知縣罷官歸旋卒邑人宗金樹哭以詩曰七旬鶴嘯人長往萬丈龍遊濬未成夾袋尙多時務稟題旌空署宰官名出山未獲材猷展孤立難邀附和聲生死異途同灑淚果然命薄是書生

吳鍾瑞字醴泉幼具至性大父錦曲衰齡寢疾瑞佐父侍養父甚愛之瑞日修子職父嗜魚瑞剖魚河干魚忽逝方錯愕間前魚忽揚鬣來取以進父抱沈疴瑞侍養盡力及卒哀毀幾滅性奉母益謹母無疾卒廬墓閱月朝夕上食如生時壽六十七

周佩華字紉蘭幼聰慧能讀父書早歲遊庠食餼邑有善舉無不竭力襄贊尤孝友得親歡心有欲公舉孝行者力辭嘗刻四言孝經及父所著忠孝節義初心集父歿廬墓卽施其宅爲豐備倉捐穀備荒孝子仁人洵無憾云

程曾源字星溪增廣生事父以孝聞父省試卒於道曾源

慟父之死謹誌時日於書帙以自怵嘗飲親舊家醉衄血母曹戒之遂終身不飲屢試不得志以所學授後進成就甚眾悉自拔於俗可謂以身教者也年七十九卒孫幼門人經紀其喪垂涕執紼者數十人

嚴瑛字漢光性至孝四歲失恃稍長思母哀慟幾至失明事父先意承志朝夕無違及卒擗踊哀號水漿不入口數日體素羸至是樂樂骨立矣生平厚恤貧乏釋紛爭人咸目為長者子炳孫清暉俱庠生

嚴爾康字第堂文學捷子性至孝守身養志一慟庭訓母李病痺痿康躬自扶持置一榻母臥內衣不解帶者三年親歿垂四十載每逢忌日再拜奠醊未嘗不聲淚俱

下也少多病棄舉業為貲郎日取子史流覽自怡間錄其懿行粹言有益身心者日久成帙其與人平恕而律已甚嚴嘗曰吾生平不知講學惟讀書於誠敬二字差有得耳鄉人謂有古君子風年八十一卒子景華咸豐已未舉人孫桂芬廩生

姜紹祖字建臯歲貢生性孝友父慶曾病潛割股和藥進先是其祖遠宦蜀既沒柩停蕭寺中久貧不能致慶曾哀號徒步數千里求得之負父骨歸婦朱夢翁語曰吾借篤其歸矣篤其者曾字也嗣母顧年十九守節慶曾復臚母節行請

旌建坊姜氏以孝世其家紹祖尤善承父志生平好讀書耄

而不倦湛深經術教諸弟遊庠問字車有至百數百里者惜遇嗇以明經終子鯤庠生

葛箴字懷白諸生少失怙兄弟三人共事母箴館穀獨豐遂奉母於家兄弟來請母曰此間樂若毋僕僕也母歿箴獨力大事兄弟有緩急箴恆仗助之久之家益貧棄所居廬墓鄉人有忿爭箴力為解釋顧非其分內不往也年七十六卒子春城諸生

黃芾棠字曉峯性純篤好讀書承大宗祧以孝聞與弟繼香相友善嘗患癰繼香奉湯藥兩月芾棠慟甚顧弟在則稍解天性怡怡人莫之喻也繼香好施與然家無宿畚芾棠周之且助之施繼香歿卹之益厚授姪元文讀

成進士繼香篤內行孝友如其兄族有訟者倚以決兩公無少假借遺以金郤之卒賴以和生平重然諾慎交遊睦族敦親與物無忤人皆以為難兩公特餘事也繼香字馨傳子藻文為芾棠後元文官戶部次女適楊氏尤孝繼香有目疾女舐焉一門濟美類誌之

許春城字村岑庠生幼穎異十歲失恃擗踊哀號如成人水漿不入口者累日諸兄相繼逝家業日替事父能先意承志敬禮孀嫂教養孤姪歷數十年不忘子三鳳輝兆文俱遊庠榮澤入成均

呂春陽字熙伯幼失怙事節母蘇氏孝母病諸藥罔效春陽焚香告天割股以進得瘥踰二十餘年無疾終春陽

喪禮盡備內外稱焉

宋殿奎字文協國學生年十六父病刲股和藥以進旋愈
冒恆字并峰諸生幼失怙事母孝魏笛生觀察石葱佩刺
史折柬召之以侍養不就工岐黃每診治多所全活子
玉騏庠生

吳觀文候選布經事母孝母病刲股以進父早卒教弟觀
政友愛備至咸豐二年同人創立周濟所獨捐錢一千
一百貫大吏題奏

准給樂善好施四字建坊子淞湘俱庠生

冒西庚字磬池候選理問父普年七十庚建百歲橋於菱
環南以徵壽既失恃事父益謹冬夜必身温衾焉置吳

家腰莊田輸祠以庇族自爲經理其租息歲施棺殮族
中無力者族兄正宗妻吉恆豐妻沈兩苦節庚爲請
旌建坊修萬卷樓葺水繪園建墓門六處子安恬文生

鄧傳元字築巖附貢生事嗣母以孝聞事本生父母亦能
得歡心晚年澹於進取日涉經史著有綱鑑條議類編
十六卷周易節註讀五卷第肇元字善長父歿哀毀略
血隨兄傳元率諸弟事母孝養備至友愛之情老而彌
篤客崇川時誤傳母病馳歸血疾復作彌留時猶欲彊
起慰母氣脫而逝年四十九善篆籀著有禮雲印存傳
元子耀庠生肇元子嘉言廩貢生

叢盛猷字允升讀書入太學性敦厚咸豐辛亥以孝行奉

敕給帑建坊從祀忠孝祠

石桓如字殿武少孤事母孝母卧病問寢視膳朝夕不懈母壽至九十七桓如亦年近七十矣其他施棺施藥歷年不怠年七十二卒


宗宏桂字馨吳居汧河奉親以懇教子以嚴祖父陳寢疾桂隨諸父侍湯藥澣巾滌脣悉身任之卒年六十七子來正歲貢生就職訓導

石起鸞字嘯樓文生孝子蘭之子性孝友有父風侍疾湯藥親嘗脣滌親滌父歿哀毀成禮與兄起鳳事孀母撫幼弟起鵬起鵠皆成立起鳳與起鵬歿復撫其遺孤家無長物惟恃館穀以繼布衣蔬食宴如也

江桐字子珊庠生甲子房薦母疾侍湯藥衣不解帶者逾月祝天願以身代工詩文年六十九卒

吳秉孝字思則家貧摘園蔬奉親得二人歡弟逝涕泣若斷手足子士元字虞廷孫政興字醴賓皆能和厚處鄉里曾孫虎文議敘理問

張萬年字金玉武生事親孝每嚴寒必温其被然後退盤匱廁踰躬滌以進母年邁萬年時進甘旨有疾焚香祝天願以身代母年八十八終



忠烈

黃兆奎字星巖道光乙酉舉人已丑會試挑取謄錄議敘
知縣部銓咸甯縣愛士恤民遇縣試遴選皆雋才邑以
真儒循吏頌時粵匪滋擾軍書旁午兆奎措置有方尤
得民歡心壬子入闈試竣委署宜城縣未之任粵匪過
湖竄漢陽逼近武昌省垣戒嚴中丞常公委守中和門
賊攻武昌兆奎身先士卒奮力抵禦戰守積數十日賊
由地道入城陷或呼之去兆奎曰吾奉命守門過此一
步便非死所屹立城上指賊忿罵遂及於難兄兆琛僕
施二亦死之事聞

上諭從優議卹加知府銜給予世職子之馨承襲現任江南駐省

提塘邑人顧汝玉作詩輓之云食君之祿忠君事讀書誰不知此義見到不難行到難要看匹夫臨時志咸豐壬子歲季冬越四日武昌崩士卒逃亡將帥一空有不畏死者矯矯黃公城破城破城下如火城上官坐如此武昌一座城罵賊可無人一箇門生需之僕夫趨之彼勸我而行者謂我不成丈夫兵在頸可殺不可辱矢在胸可殪不可逐有烈烈以死無默默以戮賊狗休走吾戴吾頭送於汝手生則爲完人死則爲厲鬼嗟嗟黃公疆文就武胡司衡方任而軍府是取嗟嗟黃公反賓爲主胡出宰咸甯之城而授命武昌之府避難而行豈日無名全軀而去豈日無故乃知古來忠孝節義事無奇

祇此一念精誠不可移長子殿矣事告變矣萬骨叢叢命屍不可見矣伯父庶母幼妹弱弟都尋遍矣 聖王聞之嘉歎起有臣若此敕典禮崇其祀官其子某年某月某日某官死大書特書垂國史吁嗟乎慘莫慘於屍裂烈莫烈於殉節悲莫悲於死別三十年姻亞情二十一年文字盟別君纔四載思君已隔生君之英兮君之靈兮吾烏知爲河漢爲列星

黃純臣字誠齋南雄州知州錡子少隨兄鍾岳官山東僮儻有大志成豐十年賊竄泚純臣以鹽大使捧檄至見事勢艱虞貽書與家人訣旋奉委守慶春門城陷呼其僕王壽曰事急矣我死分也爾速去壽涕泣不忍行賊

大至斫之枕藉死城下賊退同鄉張兆熙於亂軍中尋得其屍面如生蓋已二十三日矣因得歸葬浙撫上其事得世職並卹銀壽亦與焉子炳墀承襲

章葆穎以未入流分發山東檄駐曹縣劉家口巡防有膽略能任勞苦嘗冬夜巡行黃河岸上霜白滿馬馬領下懸冰數寸從者皆瑟縮退去葆穎不以爲苦也數月宵小斂迹民賴以安旣而賊由歸德竄曹境執葆穎葆穎不屈忿罵賊怒斫之僕郭升救王亦死之以其屍投濁浪中大吏奏請議卹得卹蔭如例

程文俊字蓮舫附貢生捐職訓導讀書有大志以古人自期許及涖六合任合邑經溫李二公固守數年威名大

震後殉節死李固前臯合也文俊慕公忠義益自奮常以不得從公殲賊爲恨咸豐十年張帥調赴金陵帶勇防剿大營潰賊至死之總督李奏請議卹得世職子興元承襲

沈裕申字京生浙江通判加鹽提舉銜署嘉興府通判事竣入省賊竄浙委守清泰門城陷率兵巷戰力竭死之妾閔氏費氏亦死之婢僕從死者三人大吏奏聞蒙

賜卹銀加贈道銜予世職本籍建立專祠嗣子逢昌承襲

冒芬字伯蘭幼有大志喜讀書尤精熟資治通鑑初仕廣東巡檢受知中丞朱文恪公桂楨適徭匪趙金龍起事文恪薦芬於盧厚山制府襄贊軍事事平奉

旨賞戴藍翎補五斗口司巡檢捕獲盜魁募民畏之大雨西江水漲壞隄堰芬倡千金賑飢築金釵圍捍水患梁侍御紹獻撰記紀其事積功陞知縣補開平開平界新會鶴山間萑苻充斥芬捕治之尤留心訟獄嘗謂循吏在不擾民而不擾民當自慎獄始清釐積案民咸悅服去之日欲爲建生祠於長沙之原芬不可因改爲步鹿書院旋攝高要署乳源其得民一如在開平時未幾粵匪倡亂仁化樂昌兩縣不守賊分股攻乳源芬募敢死士三百以胡佳張延壽分領之扼河爲守張延壽然大礮斃賊胡佳薄陣後來擊之賊潰賊黨吳煥中復結羅坑山賊圖復逞爲邏者所獲悉吐其謀芬馳往捕其黨黃滿等

十三名回經曲江寺粹與羅坑賊遇部眾驚潰芬率親兵百餘人與賊戰或勸爲權宜計芬曰吾受

國厚恩恨不能掃除羣賊豈可棄要逆而退耶戰益力被創猶手刃一賊乃爲遺書上制府極言流賊形勢蓋已知有甲寅後之亂矣翌日遂卒年六十三事聞

詔賜祭葬入祀昭忠祠並於乳源建立專祠贈世職子五溶澄保泰沅廷章俱登仕籍

萬長林西鄉太平莊農戶投効積功得藍翎把總荷戈執殲勤勞王事追剿捻逆受傷死總督李奏請議卹奉

旨照二等軍功給長林子八品監生准補外委把總子盛麒幼先請承蔭監生

何有智巡洋船舵民追擊海盜傷斃奏請得卹蔭子文生承襲

章輝祖六品頂戴神木縣典史回逆連陷懷遠神木寶雞輝祖死之夏問元浙江縣丞省城陷罵賊死二人並得世職

按二人以卑官殺賊奮志死殺度亦非碌碌無所短長者惜祇得其死節事他無聞焉然忠義之氣歷久不泯忘身殉難已足千古傳世固不在多也

文苑

劉金綸字雪江副貢生家居設教品高學密時文風日盛綸以清真為主彈射文事利病洞中窾要經指授者無不破壁飛去宋孝廉繩治胡庶常連耀其高足弟子與物無忤而亦不妄交遊董理節孝祠恤廢局數十年操行峻潔後與陳烜同修縣志謹嚴有法不徇時俗論臆之子厚發庠生

石渠字芸亭諸生十歲喪母哀毀如成人事父錕竭力供甘旨終身如一日能詩喜賓客後退居鄉村荒江老屋中放歌自適亦騷壇之碩果也年九十五終著作甚富已載范志子世準字心權弱冠以詩賦克賞於周石芳

學伊克承家學晚年與顧止蘅孝廉勺甘咀芳陶咏
酒效韓孟體聯句稱爲勁敵城北王孫行云城北有三
孫面鵠衣結鶉鬱鬱不得志城關獨遠巡婦顏尙竊
母髮雪續紛呱呱幼在抱弱弟未成人一家五六口何
以足饗殮煢煢歲復歲數米與析薪有薪更有米數析
非真貧大難在來日看囊無半文婦子不足計弱弟亦
無論無菽空有水將焉活老親空庭飛落葉凄凄白日
昏拔劍裂雙背挺身欲出門阿婦語阿姑共良人情
拔劍出門去母爲幹不經阿母語阿兒出門何所營
死母甯樂爾毋卽匪民王孫前致詞慈訓不違母
母甯樂餓母兒何能徘徊復徘徊相對答不言母

就睡喚婦下中庭藏書無完部此劍本七星所值雖無
多在逢賞識真明晨汝出賣足以飽一春姊夫官巴蜀
吾請從此奔出門遇與否家書自頻頻淚從眼孔出話
自肺腑傾兩心如刀割欲哭仍吞聲巴蜀八千里妾聞
路不平夫君兩赤手何能萬里征王孫復語婦吾志不
可更莫作訪親行只當古從軍善我堂上老撫我懷中
嬰阿叔未成人諸念我同根遊子去故鄉浮雲薄太清
得計聚有日失所歸無晨嗚咽出門走回首淚縱橫北
風吹破衣落日斷人魂婦歸坐空房膊膊荒雞鳴阿姑
呼阿婦胡爲坐天明心慮兒有變佯問兒睡醒姑呼婦
連諾姑問婦不應阿姑起抖擻目不見兒形致詞婦真

巧阿姑無勞神不應無他故乳兒防兒驚良人就故友
地近與邑鄰歸遲或一月速不及兼旬誑之以其方阿
母喜不勝含笑謂阿婦爾夫吾掌珍十五學文章十六
學刑名十七學劍術十八學俠行英姿固卓卓性天尤
振振才豐運偏蹇家計累飄零昨合出門去吾死目不
瞑兒在我心安兒出我心懂兒果念母老鄰邑謁良朋
半月至一月歸家歡仍承阿婦呼小叔授之以青萍煩
叔赴五都市歸薦椒馨捧劍上街去旋歸喜氣盈善價
十金餘白鏹光晶瑩期逝兒不至母心常怛怛經年兒
不至母病難支撐劍金久無贖空釜又生塵憶兒母病
死母死目果瞪於何謀殯葬伶仃婦一身東家貸一貫

鍼帶願爲紉西家貸五百澣濯願代勤送姑歸田去從
此將夫瞋王孫苦誰恤偃蹇難縷申踏雪足無履衝風
頭無巾跣跣度劍閣姊丈解組紉叩之無消息血淚染
衣顏歸與反無力行乎去無程范睢爲張祿赤足走三
秦三秦有族兄大府爲僚儔欲謁慚形穢不于傷惛惛
其緣自天假狹路遇城闈其兄驚相顧若非吾叔生十
五能文章十六通刑名十七精劍術十八慕俠行一困
何至此縱述不忍聽出門凡幾載至此非無因細數離
家日十度易蟋鷓一家五六口難卜亡與存其兄又雙
手五內爲紛縈相期在薄暮會兄於外城王孫欣然去
兄懷如轉輪茫然計安出日落來野坳王孫夷俟久相

呼只一聲懷中出服佩袖底出粉紳前市買襪履後市買帽纓翩翩佳公子原是舊王孫攜手進衙署大府意欣欣問客何好能謙言一無成大府多下寮奉聘來府丞鶴俸雖無多迎舟艤河濬阿兄送阿弟拜手皇華亭王賓緣真合密邇同弟昆爲作室家計同幕相助并川紬八十尺青錢一百緡遠道無便使胥魁探訪精臣里有旅舍昨來少年英聞與君同姓有叔貴公卿王孫乘輿訪致詞皆殷勤奉書拜稽首錢與紬俱呈煩君幾千里遠寄到故園煩君面吾母道余離遠迤煩君語吾弟努力干青雲煩君勵吾子詩書曉夜溫語畢重探囊餽賸意肫肫東門爲祖餞分手氣軒軒低徊返郡齋獨坐

倚窗櫺計時到夏初此信達我局阿母讀兒書知兒志少伸阿婦讀夫書知夫列府廳阿弟讀兄書知兄比舊榮阿兒年雖幼應亦喜欲騰母食可甘旨母衣可絲縉一家五六口再造乃兄恩同姓返故鄉車馬自喧喧昨日婦短褐今晨繫紬裙昨日婦椎髻今晨釵不荆百緡八十尺已有誰作證况值凶荒歲饑饉屢薦臻中產尙難堪百錢米一升誰念王孫婦一家病莫與忽接遠來信忙看目皆瞪上問母萬福下慰婦千辛阿婦讀未畢悲慟填胸膺遊子今有方何從招母靈小叔大呼嫂吾兄運已亨春初有銀信川紬縐細紋遠乘同姓寄同姓素樸純吾家雖隔譜先世世交敦命兒往同姓同姓據

生憎爾父吾不識重任我豈塵爾書由爾造何能作據
 憑兒歸白阿母阿母方抱墮無何呼小叔叔試往汝兄
 往復數千里歸向同姓云言自秦中返親聽兄所申八
 丈川繭紉百緡萬選青餽贈置行囊祖餞送行旌煩君
 日致詞臨歧囑誼誼君毋偶相忘請君神細凝同姓發
 吟笑語與初相仍爾兄我不識重託我豈應爾兄有歸
 日虛實歸自分叔歸語阿嫂阿嫂泣嚶嚶扶病謁同姓
 同姓氣憑陵爾毋恃病婦爾叔已成丁喚僕呼里長拘
 之赴公庭病婦氣自結旁觀為不平簇擁同姓走聲罪
 似鼓鳴或曰鳴好官時廉泉夫子或曰立報神時李公
封立報神眾口方哄然征車來江濱車人促就道日短
威靈赫赫

不可停因念王孫婦凍餒非人形又念惡同姓人面無
 人心是時白日中似聞雷殷殷

石澣字雲江廩監生經明行修士也時皋邑稱經師者陳
 蓉江煥劉雪江金綸與澣為三一時有三江之目澣高
 才邃學提倡宗風門下士成就去者百餘人顧數奇不
 偶以教授鄉里終士論惜之

陳煥字柳塘號蓉江 恩貢生學碩品端不詭於俗文思
 如風發泉湧每一藝出人輒歎服讀書之暇惟詩酒自
 娛無他好也子霖生震生俱入邑庠次雲生字子雨尤
 聰慧道光己亥登賢書其祖柏中前己亥北榜六十年
 先後濟美時論榮之孫樹穀字少白幼孤母吳守節撫

之弱冠遊庠屬文不落恆蹊卓然有名大家風惜屢躋棘闈年逾四十僅得食餼旋以廩貢卒樹穀子汝礪庠生

吳瑞清名康國以字行號學山邑庠生十歲能文十三歲應童子試家極貧旋丁父憂事母張以孝聞娶王氏以鍼術佐甘旨生二子長開陽次開泰嘉慶十四年母卒王亦隨歿瑞清年方三十二終身不娶館於豐利之北鄉與親堂兄太學生康全善其子增貢生開駿亦授學焉時已無家歲時往依於途中拾得遺鏹並一質錢帖因思曰此人當除夕若非甚窘何至質錢訪其主歸之後其子成進士授滇南令隨之任不名一錢時以忠愛

二字爲教陞任思茅同知請

封奉政大夫陞安徽太平府時已回里加級

晉封中憲大夫適里中議立撫幼塾捐錢二百餘千玉成其事年七十二卒於家

吳連茹字芸輝庚午科舉人品正學粹作文力追先輩爲一時諸宿學冠館邑人朱兆蘭家子齊彥受業焉誨文藝必兼德行每公車北上艱於資斧不以告人兆蘭微窺之贈以金拒不受再三請方許暫貸其丰裁之峻類如此

顧嵩壽字邢灣庠生性渾厚儉約自奉父塋登壽榜兩次隨親北上平生好善設節堂以恤孀嫠建總坊以闡幽

潛年七十七卒諸子有聲巒序

冒兆鯨字晴石 恩貢生屢薦不售性風雅好遊覽每省
試渡江金焦北固棲霞諸勝探幽躡險留連忘返與徐
生菴沙菊潭輩詩歌唱和畫水繪園圖冊徵詩名流題
詠殆徧其自題云此地爭誇二百年地傳畢竟是人傳
幾間老屋非樓閣一派秋蟲當管絃今日公卿常問訊
昔時仙佛總因緣輞川圖內多詩趣敢向名流索錦聯
生平持已儉約與物無忤尤好獎予後進年七十七卒
徐珠字生菴性孝友少隨父觀政浙江運副任讀書西湖
治聞彊記不屑事章句兼通易理星象諸書俱有論著
詩古歌行沈雄豪宕不名一家行草書鬱勃離奇生氣

遠出晚年歸卧霽峰園山亭水榭重加修葺與諸名流
觴咏無虛日暇則作擘窠書著述益富有畫雨樓稿草
堂集行世賈大夫祠詩云佳話流傳廟祀崇大夫遺蹟
此城東荒塍曉月如弓滿古戍桃花似馬紅一箭蛾眉
飛豔笑千秋嬌女睽明瞳雪消隴雉鳴春早遙聽原頭

獵獵風

宗探字味根歲貢生少遊吳蘭谷先生門品端學粹書法
精妙零縑斷楮入咸寶之子金枝字吟白庠生工詩能
文幕遊諸郡後官宣城有聲其寄友札云學趙忭之焚
香清夜事可告天效劉伶之荷鍤中途死便埋我可以
知其爲人矣常州王家相太史掌教書院贈以駢體及

詩駢云味根三兄攜哲嗣過予於露香草堂秀骨靈襟
清眸皓齒楊德祖對楊梅之歲傳茂遠買歷日之年妙
解文章淹通經傳於時溽暑應節忽覺清風入懷既慕
哲齡益珍異稟勉爲經庫須效書淫此時識面知爲交
代之神童他日通經必是過江之名士詩云衣薜餐松
大隱家名山靈秀茁蘭芽月儀製就驚前輩洞井詞工
從屬車天下文章歸阿士佛門福德種曾珈乘風破浪
尋常事好下經帷自燎麻少受知於邑尊沈西雖先生
沈游升太守金枝依其幕府有送吟白歸里詩云終軍
對奇木賈生策治安西京兩少年大才何槃槃風流
寂幾千載復見精靈起東海如吾生者真其儔下筆縱

橫雜荒怪留侯狀貌如婦人魁梧奇偉無等倫元龍意
氣吞餘子磊砢英多已如此我時牽絲宰古鄖橐筆來
試揚班文青衫著不滿三尺蒼頭起特冠一軍我今債
廡居吳下幾度相依不忍捨青鳥營巢擇木棲秋風歸
妹愆期嫁男兒二十不得官飯糞百甕羞儒冠才人失
職負奇氣要乘長風走萬里聞我衝寒向北征亦願賸
車戒行李及憐母惜行不得別我言歸廣陵國北風蕭
蕭吹古愁纏縻不止涕泗流作詩送生生勿悲英絕領
袖非子誰矇矓莫作羊公鶴看爾青天刷羽時

姚鵬春字古鳳明經雋五子幼穎慧過目成誦年十九遊
庠旋食餼性嗜金石每赴試書帖必滿載而歸雖沒字

碑亦購回以備參攷著有十三經管見三十卷金石跋尾二十卷古逸詩彙十卷丙申貢入成均邠春浦學使給經明行修額居白蒲鎮鎮本晉蒲濤縣地安帝分廣陵郡爲五縣置山陽郡蒲濤其一素無紀載鵬春旁據博採極數年之功成一鎮之志本鎮沈飴原總憲擊節稱賞爲之序年七十八終子鸞增貢生孫榮慶國子監典籍

顧暄字霽巖幼聰穎弱冠文名籍甚辛卯壬辰聯捷成進士官禮部主事以父年逾九十告終養主講馬陵書院馬鑾坡太史尹杏農侍御皆出其門父服闋赴部供職龔季思尙書極相倚重奏攝儀制司印務兼司務廳行

走歲終披閱學政咨文生員有緣事可矜恕者力白堂官原之嘗曰士子苦志一衿忍以小過輕褫之乎年五十卒於京邸著芸香書屋詩鈔子乃德候選縣丞次承基孫輝祖繩祖俱庠生

顧鈞字沘蘅少有大志弱冠登賢書鍵關蕭寺刻苦自勵與里中同志結社文名益噪遊京師公卿皆傾慕之後任寶山教諭以疾卒於家鈞氣宇不凡目光如炬崛起榛莽中奮志讀書望而知爲偉器性尤沖和少與同舍生赴郡試生侮之以其受食器便溺焉僕驚告鈞鈞命棄之河無他言人咸服其雅量

石崇鼎字書勳諸生博覽典籍過目不忘或抽架上書試

之悉朗誦無遺尤精熟通鑑紀事本末吳穀人祭酒王講揚州屬書勲代和趙雲崧觀察岳祠銅爵七律四首極爲稱賞性好潔案無纖塵終日焚香危坐問字之外門無雜客

叢長青字際雲廩貢生明經盛鳴子三歲失恃事繼母如所生父督課嚴謹守庭訓必待色霽而後安父歿授荆溪縣訓導板輿迎養後丁繼母憂青夫婦亦年登大耋矣屆例重遊泮水宜春字學使題賢宮碩望額表之子培春附貢生

宋繩治字易菴長洲相國文恪公後高祖廣文益始居如皋繩治性至孝弱冠能文遊庠後隨叔祖少司寇鎔北

上肄業成均旋聞母范疾慨然曰吾以功名羈都下其如倚閭何遂回里教授有經師人師之目甲午登賢書乙未考取覺羅教習甲辰大挑二等以教職用嗣父敏正膺疾衣不解帶者百日父歿哀毀遂不起著有還讀齋稿子桂林庠生

胡連耀字佛生幼警敏家貧好學未冠補諸生詩古文辭清新俊逸冠絕一時人咸目爲翰苑才庚子中副車癸卯登賢書甲辰聯捷授庶常乙巳散館改授吏部主事保送東河學習是年丁外艱回籍服闋仍赴東河甫半載又丁內艱其時福元修宮保

特旨簡放漕運總督兼管兩淮鹽務奏派連耀幫辦適周文忠公

奏請撥淮北引鹽十萬派員招販領運接濟皖北軍需
宮保因委督辦餉鹽乙卯差竣歸里卜居申家莊丙辰
歲歎率紳耆勸捐賑濟年四十五卒於家著有雪窗寒
碧詩詞各一卷北行至十四總云未愜江湖意觀潮到
海墘地平鹽作嶺桑少草成田舶冷三山雨村明萬竈
煙詩情移不得吾欲問成連浮生何所似井底笑鳴蛙
欲覓釣鼈客來乘貫月槎海雲無定色斥壤發奇花知
有金旂迂天吳拜水涯斥鹵居人少廷墩布似星日高
平野白潮退午風腥留客黃姑膾傾醪綠瓦瓶義軒久
不作此意在滄溟落日歸途遠驅車過范隄遙檣上燈
火大蜃鬪虹蜺暑淺裘嫌薄沙乾面欲驚還思金闕上

高枕聽天雞煮鹽曲云一總二總墩連隄團瓢覆地如
雞栖坎深置火懸巨鐵海泡萬沸吹玻璃丁男汗血體
半裸昨日官衙報起火入口衣食一月儲漬灰輦薪敢
偷倚大車滿載牛馬牽入垣輕重憑商權聞道岸銷引
頗滯一桶不值千銅錢揚州五月天中節富商大厦高
嶽臬湘簾棊几坐綠陰紈扇交揮猶苦熱可憐竈戶愁
薪米濃煙滿屋日盡眯日中暫曝快涼爽塗炭肌膚黑
如鬼去歲煎鹽樂有年妻笑簪花兒衣棉今歲煮鹽食
無粥妻瘦面鰲兒夜哭富商連船私亦官窮黎肩販須
鞭扑吁嗟乎安得滄海變桑田萬竈曙色生炊煙秋收
禾稼堆滿屋夏畦雖病心歡然耕田鑿飲逢 盛世不

羨大賈多腰纏

馬捷三字庾南文生父中騮以孝行聞於

朝奉

旨旌表捷三家素貧獨力建坊不以有無龜勉兄弟平生秉性剛直設教甚嚴遊其門者皆能有成孝廉石崇高其函丈都講也壽七十七子如琳文生現壽七十四孫錦繁廩貢生候銓訓導

婁皋字嘯亭十歲能屬文弱冠遊庠旋食餼同里湯敬亭觀察宦越中聘爲書記握槩從戎久之不得志鄉關之思時形歌詠其三衢郡齋詠懷云爆竹千門報歲終一囊羞澀酒錢空幾曾裴度書酬絹誰是陳琳檄愈風獻

媚難謀司命醉爲文那送客途窮故園兒女團圓處莫望春歸北嚮鴻未幾卒皋英才敏識善書翰尤精詩賦惜稿多散佚徐樹人中丞爲刻味腴堂詩集行世

沙增齡字菊潭博覽羣書弱冠遊庠旋食餼辛酉科拔萃丁父憂補應

朝考以教職用齡益奮志舉業與沈孝廉岱沈文清公岐黃

中翰沅相切磋屢膺闡薦已卯額滿見遺遂不復提筆入貢士籍選授青陽教諭主講蓉城書院課士有方解組後杜門不出與諸生講學談經耄年不倦著有菊潭詩鈔其辭王曉林中丞卓薦詩云無能甘守一甌寒受寵若驚心未安愧乏長才圖報稱敢喉外吏是麤官著

書妾作千秋想養福長留半點酸轉把芻蕘效封菲廉
能廉法不宜寬年八十四卒子長鴻鈞候選同知性冲
和好行善舉有隱德次秉鈞選用員外郎

石崇高字子山自幼鑽研文律勃率理窟以制藝擅名道
光甲午登賢書赴公車後杜門謝客風雨青燈與古人
相晤對為人洵粥粥嘗過村市絮袍葦笠里長誤犯
之不之校也後耳失聰遂不復出

葛春漣字漪亭道光己亥舉人癸丑大挑二等授高郵州
學正幼有大志東至海上從其族叔明經做遊做故者
宿漣經其指授數年遂為知名士及屢試春官僅得一
學博乃歎曰仕貴盡職吾所職者教士耳於是悉心校

課督學孫公嘉其勤未幾卒於任喪歸執紼送者數百
人祀其主於遺愛祠

顧碗先字栩香廩監生性警敏博學洽聞遇人作青白眼
立談之頃輒成詩句多帶東坡雅謔家貧嗜酒暮年鬱
鬱不得志著作甚富惜多散佚

顧聯輝字奎光文學霖子天資穎異弱冠遊庠屢邀房薦
道光癸巳學使廖大加獎賞因丁內艱未獲食餼遂絕
意進取成就後學得其緒餘皆破壁飛去著詩文全稿
題詠雜存四卷年六十五卒子六啟宗繩宗廩生紹宗
偉宗辰宗庠生承謙癸酉選拔

吳占鼈字瀛仙生而穎異未冠遊庠三十領鄉薦乙未大

挑以教諭用歷署江甯六合借補吳縣訓導出已資葺校舍咸豐辛亥督修

聖廟鳩工庀材籌畫備至年老乞休歸里陶情詩酒不入城

市幾二十年以其緒餘嘉惠後學經指授者悉爲知名

士同治乙丑重謁泮宮年八十六卒

高金鼈字蓬仙諸生英敏能文三薦不售遂絕意進取以詩酒自娛有紫雪山房詩集行世女四媿題浪淘沙詞云展卷淚潸潸杳矣親顏當年詠絮憶承歡堂上揮箋常侍側十歲金鑿 此日付雕刊未忍輕刪刪時容易作時難記得苦吟安一字燭地更闌

范景瑗字蘧仙進士輅孫也道光甲午舉人瑗家世清華

少美丰姿神彩煥發時有玉人之目久之抑鬱不得志寄情吟詠間爲小詞尤工晚年境益困及銓安東教諭而已作泉下人矣著有與研齋集十六卷散佚無存

劉本崇字芝山 旌表孝子汝奎次子清詞英辯冠絕一

時秋闈五薦未售以歲貢授上元教諭退歸授徒賦梅花詩見志兄本初字太璞國學生弟本銳字漁溪邑庠生俱能文銳尤以詞賦擅名兄弟互相師友鍵關讀書不預戶外事晚年墮篋唱和修理培園松楸鬱茂培園者先壟旁之菟裘也邑令范仕義有遊劉氏培園詩載前續志

劉本寅字鶴船增貢生工書善詩遊袁江十餘年歸後與

邑人士唱酬斧藻詩林人謂其得江山之助著有根餘
偶存鶴鶴館詩集

吳章煥字頡雲 恩貢生性誠樸每搆一藝沈思渺慮嘗
獨任修輯家乘歷數寒暑心力交瘁書成旋卒

楊忻字蓉仙庠生品正學優栽培人才出其門者多自愛
士子綬組字佩之歲貢生以詩賦稱於時居家孝友簡
默尤喜培植孤寒如堂弟顯宗堂姪安治皆其所成就
也歿後里人贈品端學邃額

賈潢字虛舟 恩貢生少攻苦夏夜苦蚊蚋納足器盎中
讀書屢困場屋讀中雋文輒曰吾不如也益刻勵毫無
怨尤意晚年耳失聰猶閉戶著書不倦有國策編年待

梓

嚴純字安瀾諸生幼能文屢薦未售生平慎重交遊不與
人爭解紛排難必事息而後已家屢空晏如也子葆成
孫桂森俱庠生

錢震字春生諸生天真爛漫不加修飾好議論古今人物
口角流沫袞袞不竭作文有奇氣詩賦尤見稱於時卒
不得志醉後每書空咄嗟自語年六十餘卒

王宗沂字治源附貢生以律賦見稱得唐人法從學者甚
衆興豪善飲飲必醉然循循雅飭不改常度見者知爲
有德之士

賈培學字樹人廩監生工書法能文章屢薦不售寄情放

達以絲竹自娛而興酣落筆文彩斐然從遊者得其緒餘無不破壁飛去年五十餘卒

王鈞字桂樵生十月父賈歿母石守志教之鈞純篤穎悟家貧事母孝竭力為母請

旌建坊少補弟子員旋食餼有文名

湯德新字振之廩貢生任何容沛縣甘泉教諭性孝友與人無競接見諸生每以先器識後文藝為訓生平博聞彊識著桐蔭書屋詩賦集年八十一卒

鄒之城字晴江寄居石港幼失怙事母孝道光乙巳為母請

旌建坊弱冠遊庠旋食餼咸豐壬子登賢書兩上春官就職

揀選因目疾遂絕意進取而請業者踵相接口講指畫終日不倦尤以砥名礪行為子弟誠年五十四卒著有

聊復爾爾軒詩稿

沈檀字雨香幼岐嶷弱冠補弟子員食餼循例得教職秉鐸海門咸豐初元 詔舉孝廉方正邑人僉謂檀堪備

召用以名白大吏達於 朝力辭不就會軍務需餉捐輸恐後晚歲家中落猶慷慨傾貲人謂有毀家紓難之風

張烜字春暉居豐利博學多才登嘉慶庚午賢書攻苦彌篤留京八載辛未會試選中復遺遂無心進取侍親色養備至天文地理書畫岐黃探著無不精通不屑以多

能名為人敦厚謙和賑飢恤貧人受隱德焉年七十二卒

沈長庚字芙仙弱冠遊庠旋食餼屢膺房薦援例得教職署豐縣訓導好讀書不預外事子裕祺庠生

江懋德字立亭庠生性孝友品端學粹有聲影聯吟詩集咸豐七年重遊泮水李聯琇學使給鬻官耆瑞額

江懋齡字子香庠生甲午房薦捐職訓導生平才氣豪邁好獎予後進酒量百壺不醉督修郭公橋及范公隄歲

饑捐賑慷慨解囊工詩文一時傳誦門人寶山蔣金和感恩詩云風雨不相見名山未報恩文章期後世憂患託師門綠鬢愁千斛黃花酒一尊平生知己感獨立此

乾坤

嚴紹光字小陵庠生家貧力學年二十一遊庠讀書刻苦竟以瘵疾卒年二十三士林惜之

劉喜淦字曾三舉茂才通經學應鄉試十餘科屢薦未售著有虞易指掌春秋提要詩書禮箋註四六爾雅類聯說文類義性理闡義文論諸書

劉德鳳字巢閣增廣生天性高曠屢試優等與同社創立

聖廟灑掃局壽七十九子榆庠生

湯澍字仙舟父世質躬行自勵澍陶淑庭誥澤以問學踰

冠以詩賦受知學使大比屢薦嘉慶庚午文為王司激賞以微疵乙之自是絕意進取乃聚子姪講習一庠推

爲鄉祭酒云澍於書無所不覽尤精醫理間博涉星家青鳥家言性剛毅能當大事嘗割沃壤入於庠范廉泉明府書名行高潔額贈之子惠元字玉成內行完備幼習經生家言試屢被乙中年喪偶義不再娶生平取與分明笑言不苟先世諸善舉力繼其美歲暮散米賑乏人無知者重輯家乘著地理真訣孫第庠生

姜春煦字藹人十歲失恃家貧力學夜深欲臥以冷水沃面驚起復讀道光壬午薦而不售以明經終非其志也著有棣萼軒集兄靈煦字晴軒增生工詩古文善書著有雙柱齋集

朱齊彥字碩菴增廣生性孝友入泮後遊崇川姚飛巖孝

廉之門讀書十年歲計科錄靡不冠其儕偶賓興輒報罷歸里教授孜孜不倦著有桂軒課藝邑令范廉泉慕其才時召之遊而彥未嘗以非義干也秉性方正慎重交遊介介然有古君子風年四十五卒遺孤暄之甫五歲妻汪氏守節撫之遊庠食餼

鄧慶增字益齋增廣生爲文清真雅正屢困場屋好獎掖後進寒峻者恆飲助之年六十一卒里人公贈惠挹春風額子二鎮廩生鉞文生

沈鸞字輅春附貢生幼聰慧弱冠遊庠名噪一時屢試省闈不售道光庚戌委署江甯訓導尋病篤不果

顧河字瑞圖附貢生博綜羣書尤研精理學工書法得其

片楮珍若拱璧

袁彥升字景之附貢生敦品力學不妄交遊教授生徒成就甚衆晚年子祖安之官廣東迎養署內旋卒

羅濟亨字敦仁廩貢生讀書以有裨身心為務學使龔寢以品學兼優額著四書析義經義類典

張存仁字鋤經未冠遊庠以冠軍食餼為文根柢經術屢薦未售年六十八以明經終子瑞鳳字吉人性放達不羈文如湧泉己亥中副榜考授州判工詩詞精岐黃著

陰陽虛實寒暑表裏辨孫告成庠生

鄭雲程字湘亭文章敏捷善書翰膺丁酉拔萃科幼失怙事母至孝因侍養遂不復出

陳炳字麗皋歲貢生幼失怙家貧好學與石崇高宋繩治相切劘人有以僻事質者輒娓娓言之而所作詩古文辭一片性靈不事搢搢著榆蔭堂稿子景蕃庠生

錢選字一青 恩貢生文學升子少失怙恃夜侍父靈席與弟霖挑燈讀書每課一藝必跽而焚之事曾祖母沈

至孝時沈已年邁朝夕左右非選弗歡也性喜食澹不茗飲客至始設筵清談竟日遇人恂恂如然自守極嚴

人不可干以非義為文從容篤雅不趨時好屢躋省闈及姪士杓出就試喜曰青箱有託矣遂不復提筆入貢

士籍年六十五卒弟霖字雨香不事章句學好先儒格言及功過格諸書生平多隱德年四十四卒霖子士杓

同治庚午舉人

湯筠字竹君增廣生少孤事大父孝積學儲寶有用世志
臯濱海例不食引鹽牟利者設鹽肆於臯勢岌岌矣筠
奮不顧身倡紳耆沮其事未幾筠沒復有謀設鹽肆於
丁堰者紳耆憫筠志白之當路事始寢臯之人得不食
引鹽者筠之力也子景榕景桐俱庠生

陳鼎字銘功家蓄無絃琴一因以一琴自號弱冠籍諸生
讀書負奇氣不屑事章句是時令臯者滇西范廉泉仕
義王書院臯比者真州吳梅孫鎧兩公以風雅爲提倡
鼎與邑中諸老輩若黃楚橋徐生菴揖讓壇坫間柯一
時之盛尤嗜金石家貧以質衣得之必折柬召友作竟

日賞興豪善飲遇事物難狀者輒以長歌舉之歌已復
飲才氣縱橫有不可一世之概顧終不遇於時鬱鬱得
瘵疾卒著有閑者園詩文集邑人顧汝玉輓以詩云腸
斷成連海上音酸風苦雨怕重吟山河影動文星返牛
斗光寒寶劍沈湖海元龍豪士氣醅醪公瑾古人心前
身明月今流水一束生芻感不禁十載交情曠代才單
丁門戶兩遺孩已憐展獲無妻誄尙說郗超有父哀三
十男兒真短折一時行路也心捲紙窗竹屋依然在今
日招魂我獨來金陵兩度感飄蓬布襪青鞵許我同驢
背詩魂馱細雨石麟墓道卧秋風名場况味深嘗蠟泥
雪前因亂指鴻此日重重思往事輕雲回首月明中十

日前尋舊雨情下牀扶病暗吞聲身如枯樹心先死瘦
到梅花骨尚清此別早知成永訣重逢祇好望來生卻
憐遺稿如殘葉飄落誰收死後名

陳士選字簡亭增廣生捐職訓導英姿卓犖文章名貴童
試冠軍歲科試屢列前茅省試三薦未售年五十四卒
秦棻字吉堂歲貢生第杓字西垣 恩貢生世承家學時
人比之兩到雙丁屢薦不售家居設教一時負文譽掇
科名者多出其門暇則花間布席詩酒聯歡棻子濤孫
煥鼎杓子炳奎耀奎俱遊庠

章衢字雲路歲貢生性聰慧著有浣花書屋詩鈔課藝二
集所居潘涇民俗獷悍衢以身教頗能化其鄉人

賈縉元字望雲增貢生少遊薛孟田先生門孟田名宗文
增廣生博覽羣書屢試高等縉元傳其學尤精熟盲左
一試秋闈薦而不售遂無心進取友教四方聞名者爭
厚聘焉性落落寡偶事母極孝母年九十餘視膳問寢
依依孺慕晚年取幼習經書日誦一過可以知其志趣
矣年七十餘卒

顧汝玉字吟石壬子順天舉人幼慧年三補弟子員於
書無不究天文地理陣法句股下至醫卜奇門命相陰
陽家言咸涉獵通曉劉太史熙載為文壇飛將同里
黃大令兆奎目為文虎下第留 習例用知縣
不就歸里杜門不出益肆力於古著崇禮論以維世後

學宗焉先是其父家騏諸生清廉公正每以功過格自勵汝玉承家學砥行立名終身不懈著有雙桂軒詩古文若干卷告災行云旱魃來若侵傷我田禾農夫嗷嗷歎欲泣不得作爲哀歌而汝玉於今五月井無寸波井無寸波於今五月事不詳種蕎麥上田種稼黍火中種穀知其不可我不詳雨天不雨飛蝗如雨天不仁助之羽我尙不不詳何哺蝗不語殘其根食其槁櫓田中更何有有片不詳亦貴如金水貴如澍買米市頭寶不持一錢市人招手去爾何老大不識事誰爲爾債主爾何老大不識事誰爲爾債主空手歸視空釜婦歎於室兒嘯於戶奸人誘以利彼富不仁倉有

餘粟與往取死於溝壑誰憐汝姑試之眼前瘡良可補縣令怒縣令怒鐵鎖銀鐺大索四境糾首亂者首亂者誰巧者逃竄愚者罹網罟我欲訴之大令大令不許我欲訴之蒼天天遠不可視國法如此爾死爾自取爾不死於溝壑而死於囹圄淒淒楚楚言之傷心不言難已四座莫聽我言止此作此詩者吟石顧子東海之鄙士陳雯字錦亭文學佩芬子性孝友恭儉與物無忤年十七遊庠旋食餼辛亥舉於鄉春闈薦而未售援例得教職未及選卒年三十七雯清瘦玉立風神秀朗幼聰慧嗜讀家人靳不與潛發篋得書就帳中讀之長益善治經讀易深究虞鄭諸說讀春秋至咯血不止學使者皆重

其經術著有詠篁軒詩文集子國璋廩生

丁寅字翼清沈靜寡言構文有精思白海峯先生令皋時課士勤暇輒延知名士樽酒論文獎掖甚至寅與焉未幾同人聯翩起而寅在苒籟廩間晚年善病未及貢而卒

顧漣字漪泉少受業程星溪先生門讀書刻苦生平寡言笑罕交遊日橫一經無他嗜好年近三十始遊庠未幾卒子酉書有聲黌序人謂漣績學之報

范咸字韶九諸生少受知於州牧何公拔冠一軍因益自奮羅集諸大家博觀約取而復規合於時同里陳樹穀吳之俊俱以制藝雄視一時獨心折於咸謂其精思厚

力無以過也與人交無城府酒後清言霏屑間以談諧人咸樂與之遊顧其中常若有不自得者未幾卒貧而無子士林傷之

吳之俊字見三諸生性孤介喜聚書丹黃弗輟尤邃天官家言詩古文辭不詭於俗然不多作嘗曰讀書當爲有用之學如不得志十年後著書未爲晚也無何以疾卒年僅三十二友人蔣元亮收其遺稿得詩一卷冬雷篇云急雨瀉如注大聲西南來震驚及百里貫耳紛疑猜歸妹屬八月造化胡爲哉前年立夏雪白骨江南哀恆寒變恆燠天地相睽乖災祥不空見何者是禍胎方今咸符瑞萬物懷春臺河清鳳凰鳴海波無風霾日月

合璧豐隆奚能災或者今年冬陽炕孤陰埋鬱促成霹
靂豁然寒門開不則有奇變管窺未可推寄言當事人
努力謀挽回挽回夫如何聽我談時事溝澮受江河大
有淪胥勢罷民迫迫呼漸苦身家贅今歲尙有秋薪米
已珠桂江南金粉餘易種恣奢麗錦繡被牆壁笙歌娛
夢寐陋俗壞人心風氣坐凋敝此豈能久長况又見災
異我聞趙人號生毛徧大地今冬桃李華木妖更爲崇
天威縱難測人禍何由避或恐阿香車先期兆乖戾却
笑古杞人獨爾憂天墜李小湖學使題其遺集云精進
竿頭正課功煥然鼉采旭升東雙金比價何曾貢一曲
專場忽已終夜有七時償晝短死而千古挽生窮良朋

忍淚編殘稿營血迷茫敗麓中蔣元亮爲之誄云士無
窮達觀其志尙巖巖吳子邦家之望英華方煥昇年始
壯君子所依天寶不貺累葉不光孕其合德篤生君子
大車有軾幼爲世異長爲民特兀兀窮年未見其息祿
養是願無仕則弔鎖院沈邃光輝玉照縣尹郡牧不知
所好戰則三北中心是悼桓桓宜黃席上是珍皎皎臨
川羽儀是振奮子逸足謂當絕羣位不副德屈而不信
子以孤露造此瑰奇異書枕祕藜杖宵吹味道之腴有
旨其辭五色成章被於素絲常厭俗學謂不可資追維
古訓以培其基不鄙謂我趨向同之顧余蹇弱中道而
疲兼人之進君實不羈臣之質死道絕於斯嗚乎哀哉

邦人之彥畢爲君友人之有善曰若已有宏獎風流不絕於口服君之德旣醉醕酒惟彼泰山不讓土厚君之虛懷括囊而受下問不恥循循善誘德音永絕疇爲之偶昔者之勤會意忘倦把卷高詠忽焉申旦木客窺窗詩張爲幻苟有屬和鬼物何患念子在郡異書甫致喜見顏色告我以意卒業未能子疾誰治請徵蓼莪余將是廢嗚乎哀哉神將奪人天道不顯曰有先幾知其不免三歲爲期巫陽則遣懼不敢占妖夢是踐嗚乎哀哉世人之傷謂子無後猶子子之以奉君婦何必所生然後克負耿耿元精子則不朽惟哀有盡惟情有至昆弟朋友久焉况瘁斂子遺文後死之義誅以遣哀請俟嘉

諡嗚乎哀哉

蔣元亮字步陶廩生好古博聞初不喜時藝及屢躋名場始攻舉業而思筆超邁迥絕恆蹊蓋其資稟有過人者遇人極恭謹然性天高曠不可一世弱冠失偶遂不娶年三十一卒著有拜經堂詩文集其古文廉悍雅近柳州

吳應辰字樞卿父葆頤幕遊山左越數月應辰生母范氏依外家撫育之幼聰慧讀書日數十行八歲能屬文弱冠以詩賦受知督學孫公遊庠食餼人咸以大器目之應辰恂恂然無以加也甲子省試房薦未售父訃音旋自陝至未幾復丁祖亮憂母范氏清羸善病朝夕需人

應辰內外交迫年二十三遂卒才而不壽惜哉

黃方漣字文若成均士也弱冠始奮發讀書刻苦過人長身玉立性極溫雅每文酒之會同人高談傾座而方漣恂恂如也至論古事原原本本所著皋乘拾遺一書採百餘家言斷以己意得作史之法詩古文辭俱有法度年未四十卒士論惜之

如臯縣續志卷九

列傳二 官績 義行 耆壽 方技 寓賢 官績

石珩字慈佩少讀書不事章句援例簡甘肅知縣大吏奏留陝嘉慶六年攝洋縣事額經略使珩增築華陽堡例保固旋授平利縣縣接壤湖北竹山值軍興劇賊姚之富齊王氏等竄擾德帥掃蕩奏凱敘珩堵禦功擢甯羌州既兩攝定遠陝甯撫民同知丁內憂去官服闋撫臣以保固仍奏留再權定遠補耀州會同官有冤獄縣官不能治民攀盧中丞輿泣請石耀州一鞠死不恨遂檄珩往獄竟寬民悅服道光四年調隴州張格爾反檄治

軍儲於土魯番張就俘敘績擢幽州十年權興安府事
先是郡大猾史班揚張星白胡正澁等虎冠橫鄉里珩
擒治之擬軍徒有差初郡以歲設稅卡凡漢中米入
楚者徵之既穰延爲利竇珩至立撤去民歡呼獻衣繖
焉夏解篆士民擁送至馬首不前秋代大臣祭告西岳
以軍事藏修祀岳瀆也攝潼關同知兼護潼商道十二
年回幽明年權延安府一歲仍返幽以疾留會城卒珩
能詩有蒲上題襟集尤工書嘗勒數幀置西安碑林中
或以爲其書能辟火云弟琛采石司巡檢子用熙山東
知縣

張金誥字拙齋性孝友家庭無間言好延攬賓客多所欣

助通經史工書畫初仕山西汾州府經歷捕教匪王朝
濟朱亮臣等以卓異升用繼銓安徽甯國府經歷歷署
縣缺有政聲疊膺保薦旋丁父憂服闋銓江西袁州府
經歷修郡城建考棚捐義穀旋推陞甘肅崇信知縣崇
信地瘠民貧誥治之以寬撫字催科不辭勞瘁士民感
戴爲立德政碑贊云政歌棠舍坐安恬遠播仁風三異
兼祈雨每期詠樂國清刑不忍累窮閭荏苒能以寬洪
化桃李競從樂育添父老久懷持贈意慈君德政萬民
瞻罪民受誥撫卹感激銜恩亦呈送德逮楚囚四字額
生平歷署甯鄉汾陽臨縣文水石樓等縣安徽祁門甯
國建平鳳臺東流宣城南陵等縣及甯夏府鹽捕通判

年七十五卒子兆齡候選從九品早逝孫士傑議叙職銜如傑候選知縣

黃錡字鞠坡少有膽略勤學問屢試不售佐其舅氏江西觀察張公溶幕值川楚多事援例得廣東縣丞嘉慶十四年艇匪郭學顯等作亂總兵許廷桂拒張保仔鄭乙力戰死賊勢張甚議撫學顯總督百文敏公以司道府交薦錡乃檄錡副以千總往錡涉波登賊舟賊露刃迎錡談笑自若反覆開曉數千言聲情激烈學顯感動以計殺鄭乙俘保仔以獻餘黨平制府上錡功晉通判旋以父喪歸服闋補高州通判殺盜升知州署連州州界廣西湖南猺獠砦雜村落八排猺尤悍奸民爲天地

會者讎猺蔓延三省錡條上練勇固圉事請下郡縣見者以爲迂遷南雄州數月引疾去後趙金龍起永州八排猺聞風變竭楚粵之力糜餉勞師經兩載而後定乃多錡先見焉錡篤親族尙風義兄弟歿於官皆撫其孫成立贖同官遺女於婢庀裝以嫁歸里創繼善堂掩骼養疾賑貧濬城濠治道梁鄉里德之著半解集詩稿邑令范仕義題其集云知名傾耳絕儕倫海上相逢倍覺親十載宦成經濟遠一篇詩寫性情真居隣水繪身常退筆挾風濤句有神此外升沉何足問等身書讀待傳人壽七十二長子鍾岳季子純臣皆另有傳次子全臣候銓知縣

吳丙輝字燮堂山東鹽運司篋次子剛直好義有經世才
 善岐黃兼申韓家言早年隨父官皖閩參贊煩劇援例
 州牧分發四川以親老告近改安徽歲丙申丁父憂服
 闋赴皖權泗州篆俗素彊悍下車日即獲土梟置之法
 四境肅然值水災賑濟必親查按給不假胥吏民賴以
 生捐廉建奎閣清渠務重士愛民中丞程公以勤敏練
 達保奏旋丁母憂哀毀過情抵家旬日卒年六十泗州
 紳民為建去思坊其處鄉黨逢歲歛倡賑存活甚眾抑
 疆扶弱揮金相助有古任俠風子承豫庠生候選同知
 次承觀候選縣丞繼兄椿嗣

石振綱字湘帆布經歷復泰三子生而穎異長通經史明

於治道治田州有善政田州粵之巖邑苗獠雜處振綱
 涖任不為操切一感以誠上下相安幾於簡清嘗奉檄
 捕盜於上林縣之山心關履險萬山中箚密篁叢翳雲
 蔽日行數百里無人跡卒擒其魁當事者嘉其能檄權
 田州通判百色理苗同知未及官而卒州人哀之為護
 其喪出境

劉觀字灌芙道光辛卯 恩科舉人甲辰大挑一等分發
 豫省知縣丙午丁未歲歛觀奉委賑汜水旋接篆署理
 自捐廉俸設立粥廠每日必親詣點驗旋得疾旬餘縣
 民焚香祝禱者日以千計少愈復親出明年春稟請開
 倉又賑凡有地無力之家計畝出借有力無地之家減

價平糶邑人爲立碑頌德

章寅字直齋甲子科舉人由咸安官教習任山東曹縣令有政聲曹俗獷悍多械鬪寅治以嚴得少緝性闊略俊爽好施與喜吟詩著有寶雷閣課士草年六十餘卒子曹生

湯俊字敬亭貢生屢應省試援例郎中籤分戶部補貴州清吏司兼三山西司稿俸滿記名簡任浙江授衢州府知府兩護金衢嚴道署甯紹臺道兼理海關會軍與檄治甯波軍需局紹興糧臺續辦尖山乍浦堵防省局軍需曹娥江糧臺回郡修學宮及府城鼓樓獨修爛柯山碑亭大計卓異居憂服闋授廣西梧州府知府粵寇

肆虐治理軍儲斥已金五萬餘不饜上官意被議落職留營自效督理象鼻營防堵著績起用同知旋辦省垣釐金總局撫臣奏請以道員儘先補用借充甲子科外監試又奉檄總梧五卡釐務督臣奏獎加運使賞戴花翎因勞勩遺病卒年七十一子克寬扶柩歸葬俊性孝友奉老父祿養終身不怠視庶弟如同胞私財多讓之歎歷中外衢郡生祠梧州遺愛多足述云

鄧敬輿字飛霞廩貢生試北闈挑取謄錄議敘知縣從五果亭都統鎮守烏魯木齊軍功銓授甘肅環縣改授建永定縣有善政以疾卒於官上臺飲助歸葬縣民香泣送數十里生平篤友誼揮金結客足跡幾遍天下

工書善詩名噪京師至今寸楮零縑入珍為拱璧云
吳來鴻字賓南少有大志好讀史留心古道光庚子舉
於鄉咸豐癸丑以知縣挑發浙江時賊氛交訐鴻單舸
赴浙黃中丞宗漢器之不旬月權武義邑多訟鴻摘發
如神民以鴻明敏不敢欺徵解為七十二縣最乙卯調
西安時賊竄徽饒浙及開化常山常玉兩山雖駐兵去
郡百里城守單弱郡守商之鴻鴻條畫十餘事儲餉三
千兩飭鄉團列兩營為犄角躬率練勇晝夜巡徼遺書
與家人訣迨三月台勇潰勾賊自常玉直下鴻開城迎
擊斬獲數百圍解大吏以力保危城民情愛戴上其功
且請以鴻城守方略為各縣式

詔可之並以府同知補用後省垣暨各府縣淪胥而衢以一丸

土獨固鴻之力居多丙辰兼署龍遊先是龍遊多不逞
之徒以矜胥辦留抵為口實鄉民挾前令毀矜胥室勢
洶洶將變鴻減從往民焚香載道呼曰吳青天至矣鴻
分別懲之不數日留抵案成會與監軍不協遽撤任兩
邑士民送者泣下鴻修幹宏音應機立斷當多事之秋
慨然有當世志出粟輸京倉晉階府道上遊倚重讞疑
獄定急變皆以鴻往歷任五年以積勞卒年六十至今
三衢士民像祀之

巖襄廷字雪岑工詩善文屢試不售中年筮仕客京輦以
岐黃名發江西補用巡檢以差遣入都途遇林文端公

與談大悅偕至廣督任將大用之未幾林公以事去襄
廷復歸本省歷任廣豐洋口及八方場白水司等處巡
檢所至有清政廉能疆幹上遊重之晚年致仕設醫局
濟世年九十餘卒

冒葉字蘭仲議敘縣尉補甘肅金縣典史植節概竣丰裁
人莫敢干以私視城垣半圯與邑令恩福鳩工繕葺植
護城榆柳數萬株期年後濃綠蒼翳行人如在畫圖中
呼爲冒公樹邑有廟坡山建壇其上名曰文峯金縣科
第由此大盛縣西新路坡山水齧壤捐俸監修興隆山
谷中出冽泉夏流冬涸率役開鑿河州米拉溝賊頻年
爲民害會同營員緝捕適升紅水縣丞紅水爲皋蘭邊

境當黑番寇掠之衝創築寬溝新堡起礮樓三十餘處
製器械數千勸編戶輸糧備支三營兵糈事訖餘糧三
百五十石以其資建書院有富室緣巨案牽累密以干
金賂葉峻卻之旋爲平反卒年六十八民建祠祀焉
薛焜字藜樵學詩長子少習舉業工書屢試不售考授主
簿署直隸文安縣主簿歷辦 謁陵大差授山西長治
縣讞獄得情署澤州同知告歸子長時敏議敘從九次
寶泉監生履恆署山東濮州吏目

薛潢字銀槎學詩次子少習舉業從揚州史大司寇致儼
遊三應京兆試丁卯癸酉薦而未售謁選得吏目署東
城副指揮改授布政司理問澹於仕進以岐黃壽世常

喟然曰不能爲良相盍爲良醫全活不可勝計蘇州彭文勤公爲序其詩集著有仰高堂存稿取一生低首味和堂之意子長寶圖議敘從九次寶田上元縣訓導浙江候補鹽大使寶年光祿寺署正孫受采附貢生浙江府經補用知縣

馬之璫字寶庭湖北棗陽縣尉善騎射嘉慶元年蓮匪猖獗從事戎行不辭勞瘁時同里張觀察溶守襄陽將特薦之幕府辭不就後以葬母告歸年七十二卒子永從九孫暄庠生

蘇雲程字菊人歷任江西新城浮梁貴溪縣丞性廉靖公餘之暇哦松衙齋解組後不名一錢工書善詩著有菊

人詩鈔

沈廷榮字梅垞通判鳳佐子以貢生應鄉試屢薦不售歷仕兵部武選司主稿員外郎並武庫司行走道光乙酉丙戌鄉會試武闈提調兩浙嘉松鹽運司運判工吟詠李榕園都轉修禊水繪園廷榮和詩極爲稱賞復遊培園唱酬甚多

黃鍾岳字申伯文生善詩賦工書法歷任山東平原鉅野縣事賊攻鉅野鍾岳練兵固守賊圍城三日知其有備乃退以守城功特用府同知卒於省

汪棻字松泉山東道承鑪子官山東西繇場鹽大使平穀掖縣境內土山暨掖縣平度州交界之膠河東堤等私

開灘池十七處嚴禁私弊粵匪逼近西繇械修整土圩
集團堵禦暇則吟詠自娛漢魏六朝唐宋名作無不記
誦年甫三十卒有幻影軒詩詞一卷子登仁

張兆熙字星楚援例鹽運司經歷分發浙江辛酉題補石
堰場改補曹娥場大使丁父憂回里邑中撫幼塾周濟
所及賑饑保衛諸事皆襄辦焉第兆鼈浙江西安典史
粵匪竄浙守城有功薦擢陞缺後捐升運同銜試用通
判

季濬字虞川官浙省生而俊異幼讀書有遠志年弱冠應
試未售以父祖珊年高因有捧檄之志援例入官然家
鮮昆季未即之官在籍之年所居之丁家所鎮義塾義

賑諸善舉靡不捐貲為倡後以父祖珊命趣令之省時
浙遭髮逆亂後地皆兵燹之餘撫綏需人藩憲蔣以濬
才具精明可任委署烏程湖口大錢巡檢安吉縣典史
到處辦理善後循聲卓著浙民沐其惠澤一時有生佛
之頌焉旋因積勞成疾歿於官舍賈生之年不永時論
惜之

楊永清字芸卿浙東巡檢會粵匪起豐運糧饋餉有覽轡
澄清之志積勞卒年三十二


武勳附

顧清漣字盈川嘉慶丙子武舉歷資至南澳鎮總兵官咸
豐三年會匪亂漳泉廈門隘南澳孤懸海島與漳廈一

水相通漣籌廉俸買穀三千石於碣陽以實倉廩復請之兩廣總督奏調水師三千粵餉二萬以濟閩先是賊黨蔡阿興陳阿佔約大股賊期五月十五日犯澳以金山伏火爲號漣先期擒斬阿興等至期賊數百艘大至漣率師禦之賊以軍整伏火不起遁諸賊出沒銅山詔安饒平廈門漣復與粵師先後駕舟攻勦進焚賊首林米員巢穴餘黨平四年五月以勦捕逃賊黃位遲罣吏議解任子紹榮旋會官兵擊位於萊蕪洋位沈於海部議復起用漣漣以年邁呈請回里紹榮得議功補用府同知咸豐六年漣重遊泮水年八十一卒漣善識拔歷下偏裨多至將帥尤惠愛士民旌靡所歷恆尸祝之第

清源亦以武舉歷官山東登州遊擊勤於王事與清漣齊名

劉長清字湘浦生而穎異文試未售投筆習騎射登乙卯武科越明年赴試未第納貲得兩淮漕標千總家有園亭水竹之勝日與里中賢士酬酢往來陶情詩酒尤篤宗誼族有貧者賜卹備至居恆手不釋卷布衣蔬食晏如也咸豐五年重赴鷹揚懋都人士莫不頌其福祉壽八十五終邑人范景瑗輓云射虎山前飲羽欽崇壇上將換鸞筆底學窠鄭重壁間書蓋紐寶也子寶麟列成均孫全穀浙江候補縣丞



義行

湯臨字穆堂善事親父性嚴毅未嘗少拂素習形家言母
 在殯與兄跋履田間經旬始得地窆之道光初元獨修
 大成殿邑令甯書翊贊宮牆額贈之設義舍病予藥歿
 給槥成梁鬻道歲以為常而功尤鉅者為乙亥之賑多
 方稱貸獨力蕝事全活萬計壽八十五長子俊另有傳
 次子伊字萃巖廩生入成均襄治浙省軍儲敘得國子
 監典籍性仁愛重修大成殿斥田百畝為義塚兄觀察
 俊久宦獨綜家政得老父歡心待庶弟有恩晚築培桂
 軒課諸子卒年六十五

施廷楹字覺軒好善樂施凡有益於人者知無不為江南

陷倡首賑粥他如施藥施槽修廟修橋善舉甚多歿後
災黎贈哀鴻得所額里人贈德垂桑梓額子三倬佐俱
庠生傑癸卯科舉人有雋才

沈鳳輝附貢生爲麟子繼叔爲嗣後事嗣母沙孝養備至
沙年八十餘侍疾帷幙衣不解帶者累旬及卒哀毀幾
不欲生幼穎悟力學卒不售循例以知縣候補生平有
經世才遇事排難解紛邑中公事如修城濬河葺治文
廟諸務無不踴躍輸將嘉慶道光間兩次辦賑皆董其
事傾資竭力全活無算前邑令田以珪璋粹品額旌之
暮年蒔花種竹課子讀書長子橙廩生次子楹拔貢歷
任海州學正揚州府學教授兼理訓導三子檀廩貢孝

廉方正海門廳學訓導孫裕淵裕澍裕淮俱庠生裕淮
兩浙試用鹽經歷署許村鮑郎玉泉場大使

汪之璟字魯珍國學生居豐利乾隆年間海潮泛溢傷人
甚眾倡資施棺殮無王者親督瘞之歲歛董賑不吝已
資不辭勞瘁年七十五卒子爲震性純篤攻書早卒爲
雯字蔚章國學生嘉慶年間增修范隄親督整理掩埋
暴骸道光壬辰董賑積勞成疾卒子承鐸繼爲震嗣

汪承澤字滋香候銓理問爲需次子捐職同知修登豐石
橋及三元宮皆與弟承業竭鉅資咸豐辛亥海溢淹斃
無算施棺殮之內辰歲饑捐資倡賑皋邑鄉會試費育
嬰堂撫幼塾皆勸其兄承鏞捐田助經費冬則施衣賑

粥夏則捨藥給茶歲以爲常戚族待舉火者數十家年五十四卒子榮議敘毓麟業儒

楊葯坪字芷林增生世居白蒲鎮道光年間歲歉倡助粟五百石富者各開倉相救民乃活邑尊范詳奏給賞議敘八品建文峯閣其力尤鉅耄年募建南石橋功未成而卒至若精工書法曲肖歐蘇猶其餘技也子承宗字敬夫事親孝取財廉讀書不治章句慕古人奇節偉行性嗜酒落落自豪吟詠嘯歌灑如也著有鋤月山房詩稿

祝亭立字晴峯國學生天性孝友樸誠端謹邑中先輩及四方績學之士咸樂與遊晚年杜門謝客而於里中利

濟之事如同仁堂養濟院育嬰堂靡不捐資伙助復以田九十六畝送繼善堂施措施藥壽八十四易簣時勛子以孝悌廉讓慕九族同居之義子昌裔庠生候銓教諭克承父志年六十卒昌德候選同知

吳炳蔚字文軒庠生世居雙店幼失恃其父有足疾性嚴峻能曲盡孝養以博歡心姊適人所天不善謀生迎歸供衣食終其身嘗過州前拾遺珠七百粒坐俟其主歸之無德色逝後數十載門弟子銘其書室曰學通性理道務躬行和光外藹剛德內瑩口碑載道閭世猶然及門阿好夫何敢焉

吳紹美字雲湄食餼貢成均需次教職道光丙午集同志

建周濟所施楷施藥已酉上遊水溢瘞浮屍厝棺無算
年七十八卒著周易直解引端

趙鼎錫字禹疇馬塘人家不中資事寡母竭力承歡弟鼎
言鼎瑚先後歿言遺妻周瑚遺妻顧孤子壙甫四歲錫
恤嫠撫孤無難色有族人將娶目旋瞽妻父欲改議以
索聘資為辭錫助之既婚且給其不足錫通岐黃歲施
藥餌顧後以節孝

旌墉弱冠補諸生食餼貢成均謂非錫之力不及此年七十
八卒

黃鏞字劍光國學生嘗遊海陵拾遺祿待還其人則夫將
死而婦假親串物質以為殮者也生平精岐黃恆施醫

藥暇則蒔花種竹鼓琴對枰為樂壽八十一

曹鎧字鈞衡幼失怙恃與兄銓相友愛共居四十餘年道
光辛卯洪湖水溢流亡如蟻贊其兄賑卹兄歿修

御碑亭建關聖殿捐產育嬰堂施楷櫛置義塚咸豐丙辰歲旱傾
困賑濟計值千兩以上大吏達於

朝給樂善好施四字建坊曹家埠年六十一卒

沈洪字青園庠生道光十九年倡族人濬石莊鎮東沈家
甸新港逕龍遊河至補闕橋東西延袤九里便民通商
泰邑赴郡之船利賴尤多即今常清河

許殿魁字星菴幼失怙事母孝以府同知就銓聞母疾遄
歸道光甲午歲饑賑濟邑令范仕義贈以惠及桑梓額

他如施棺槨置義塚建卹憐所放生池義舉甚多有棠華書屋詩文集

吳殿揚字侶樵有幹略能任事鄉里多質成焉道光二十一年邑尊諭令董濬護城河及龍遊河捐資得議敘咸豐六年襄辦賑濟請廣學額倡貲創建撫幼塾文武成材者多人尤為眾議所推

婁昂字曉亭國學生居丁堰家本中貲而好義鎮西隆興橋圯倡貲新之歲饑傾困賑粥顧苦粟無多乃詣富人請且力勸之曰與其擁粟齎盜糧何如發粟發粟免覬覦且得名於是富人喜皆賑粥昂素質且里中事取決於昂昂委曲導之類如此

婁棟字雲浦理問銜咸豐六年饑倡首放賑一鄉賴以安修廟濬河建祠創譜善舉甚多卒年六十

尤震字健初國學生咸豐丙辰歲饑斥已資賑二千餘金其子鈞字片石竭力襄及賑全活無算先是震倡善堂設義塚施槽施藥范廉泉州牧嘗撰積善記以贈弟霖字汝南過費姓義塚見叢葬無餘地就其旁斥已田廣之又易遠祖墓田歸家祠霖卒子珩字慈佩能守伯父震訓當震賑饑時珩亦出粟助之每歲暮陰周貧乏又其族有尤筠者家中貲亦好施

劉朝慶字摺廷就職藩佐祖人輝父禮皆有義行朝慶能承先志邑有圓通菴建振秀樓於前以助文風復建土

地祠居病者疾施藥殛施措葬施義塚其他治橋梁濬河渠皆踴躍爲之弟兆桂字葵圃咸豐六年出粟賑飢指困助邊子三炳章理問承朝慶後憲章州同煥恩庠生

何日華字雲濤貢生嘉慶間歲饑賑濟捐送繼善堂田五十二畝生平尤篤於親族告貸未嘗有難色子俊奎太學生良弼候選州同孫烜候選理問九皋庠生若霖通

判

盧泰字禹德國學生道光壬辰歲饑出穀賑濟邑侯范仕義額以樂善好施子五芸荃蘭芝瑛均國學生捐鄉會試田頃餘又續捐育嬰堂田畝皆承先志孫十八長齡

已酉武舉錦標文生占鼇癸酉武舉占魁庠生長生長延等多入成均曾孫林立俱業儒

季雨樹字竹亭國學生居豐利嘉慶間勅設水龍同仁施措會咸豐辛亥湖災殮埋無王屍數千壽八十一

吳攀龍字桂軒居車馬湖官福建巡司嘉慶甲戌歲饑賑粟重修湖上武廟獨建文昌樓添設安定書院考器先是其祖廷純生子金金生子鬻鬻生子三錫三錫生子國禮國禮生子道宗道宗生子江江生子裕裕生子銳俱能讀父書有聲鬻序國禮並登萬厯壬子經魁攀龍作九世青箱圖比於劉氏十五世明經廣徵題詠可謂不忘祖澤者矣子文杰孔目工詩畫篆隸鐵筆擘窠書

馬金門字錦堂候銓理問邑有公事悉倡捐無吝色年七十卒子勳字冠羣庠生繼承父志亦急公好義濬城濠及龍遊河皆出已貲協理告竣邑令范仕義詳請議敘叢盛鴻字性南監生贖遠祖祭田修節婦祠字賑凶荒埋齒幣孜孜爲善終其身子世驥字秉淵孫其慶字篤齋其文字星杓出粟賑飢指困助餉皆能承先志云

陳滄字旭東監生豐利人道光壬辰甲午兩次捐賑倡族人修范隄重建場東文峰塔其他修義塚周貧乏善舉甚多子桂茂議敘

徐長清字贊熙登道光乙酉武科道光壬辰甲午歲饑勸捐賑濟戊申水災復勸捐咸豐辛亥海溢淹斃甚多捐

貲殮之辛酉以修范隄

守禦所千總銜年六十七卒

劉全吉字迪菴庠生歲饑襄勸賑濟不避勞怨修先賢古墓助社學田畝晚年杜門不出著寫心集一卷年八十四卒

管椿監生嘉慶十九年放賑二十二年獨修止馬窪關帝廟次子嶠監生道光元年施棺百具

吳範字洪九居車馬湖弱冠有遠志篤好經世學納粟爲部郎家居遇不平事義形於色聞鄉黨有困苦者指困無吝色咸豐丙辰歲饑出穀數百石賴以全活無算至今里黨稱焉

吳筠字澹安兩浙候補運副道光戊申裏下河灾有流民百餘至車馬湖筠衣食之俾無欠所咸豐丙辰歲饑捐穀數百石設局賑濟同治二年施田十七畝半於車馬湖武廟爲香火貲先是其父匯字滄邇由議敘縣佐加府同知鄰里有義舉無不解囊邑令出旌其閭曰推解遺風論者謂筠善承父志云

黃鈞字觀橋議敘從九少隨兄錡宦遊粵東歸里後創立繼善堂施送棺藥道光年間邑中挑濬龍遊河興修城垣襄理其事不憚勤勞生平尤慎取與絲毫無苟壽七十八

鄧齡字錫堂例貢生承父志咸豐丙辰歲歉出粟捕蝗丁

已復賑百餘日不怠

吳桂馨字一山廩生性慷慨向例鄉農有肩薪入城者不
僧不得過問咸豐六年牟利者手秤於市不許私相售
買勒索用費民甚不便桂馨率紳耆白之邑令上官夔
嚴示諭禁立有案同治十二年有復倡舊說者邑令胡
維藩授案禁止事始寢人益思舊德云

婁容字惕若國學生父礪字左佩工岐黃容事母善承厥
志嘉慶丙寅歲歉賑饑甲戌辛卯亦然施措施衣未嘗
少懈

鄭駒字千里捐職鹽知事道光庚戌咸豐丙辰歲荒捐賑
卹養育嬰施棺諸善舉胥竭力年七十七卒

沈洞字酌亭十六歲遊庠甲子房薦援例通判林梓鎮有
觀音堂關帝廟文峯閣圯竭力修建以城工議敘五品
銜著吟香閣詩四卷嗣子桂生字蔭秋高郵學正源之
子早歲失怙性好學以冠軍遊庠年將四十卒孫煌候
選通判曾孫珍翰林院待詔

沈裕中字常甫山東布政司經歷正四品誥職生平敦宗
睦族親仁善鄰丙辰歲饑捐貲助賑辛酉壬戌癸亥流
民過境矜恤逾常每歲除陰濟貧乏其他施糜施糶修
廟修橋善舉甚多

王兆董字庶蕃事孀母孝母喪柴毀骨立水漿不入口者
數日他如建祠修譜施糶諸善舉靡不竭力卒年六十

六候補縣丞

王兆蘭字香谷事孀母孝處兄弟和建宗祠纂族譜興義
學修廟觀及施糶諸事靡不竭力捐貲壽八十三

朱鶴慶字鹿泉道光癸巳水災捐貲助賑議敘八品銜子
長煒候選州同孫連柯監生

朱鶴儕字青田監生成豐丁巳歲饑捐賑議敘理問職銜
獨修顧家堡武廟子長煦候選理問

劉榮字步庭監生幼失怙恃事祖母以孝聞嘗修橋梁濟
窮乏歲饑捐賑施棺糶弗懈子三照職員篤監生勲庠
生

陸尊字鱸江西場鎮人鎮有惠民橋同善堂久圯均倡修

落成咸豐六年饑設法賑貸無德色

季日美字玉生晚年捨宅爲家祠並捐地基田十一畝又置租田十五畝以備祭祀

顧長安字靜齋橋梁道路寺觀傾圮董理而修葺者不知凡幾道光丙午與吳紹美等遷葬沿港無王屍無算又襄建周濟所施藥施槽掩骼埋齒

秦潔字修治成均士歲暮施衣年饑賑粥王姓質女而施金何姓喪父而施槽

錢世華字棣卿浙江縣丞居衢歲餘悉心公務上司嘉其能居鄉輸捐濟餉不輕然諾

繆連字商珍幼耽讀兼工詩性至孝色養無懈睦鄰親族

子四元光元凱元慶元輔孫曾林立

戴錫祺字蘭卿錫年字松坪尙書紫垣公孫錫祺嗜學能詩賦援例授從九品分發山東回里後董理育嬰堂賑濟保衛諸事錫年援例授吏目分發浙江加六品銜邑中撫幼塾保衛賑濟等事皆襄辦焉子鴻業浙江候補批驗所大使次鴻泰永嘉典史三鴻升候補巡檢四鴻藻候銓鹽經廳

朱齊賢字思齋早歲遊庠丁酉庚子己酉三薦未售捐職訓導著有小隱山房詩草秋舫詩鈔秉性剛直鄉會試學額保衛城工粥賑尤爲出力子三潤之成之庠生培之從九

葛春榮字湘泉國學生邑中賑濟保衛諸善舉俱襄其事
子朝模庠生

陳廷簡字鑑堂負通才援例中書嘗遊湯都轉俊梧州幕
梧被寇簿書羽檄廷簡佐之尤力歸里後襄辦防堵助
餉賑饑全活甚衆子楹從九椿衛干總嗣弟後

朱燾字喬仙國學生候選布經咸豐七年旱賑勸捐並出
已貲施粥施衣子銘試用同知分發廣東

趙春霖字雨亭國學生工醫著經驗奇方道光年間海氛
不靖襄團防事歲歉復襄賑濟

葉紘字春田國學生居馬塘生平無疾言遽色三值饑歲
躬襄賑濟邑尊范贈以品重珪璋額年六十四卒

羅錫瑞字輯五國學生居馬塘咸豐二年偕同人設保衛
備守望爲一鄉倡獎勵辭弗受子三自芬業儒自芳自
華國學生

賈惟沂字霜橋國學生嘗勸其弟芳洲助送撫幼塾田一
百二十八畝與人爲善其沂之謂與年六十二卒

劉寶清字蓮溪同知銜候選理問志節通亮咸豐庚申夏
粵匪猖獗邑令徐錕諭寶清辦理江防團練寶清晝夜
守禦並捐已貲沿江築土圍民賴以無恐

許殿華字子春候選布政司經歷早孤善事母嘗與殿魁
斥田五十畝爲義塚事載范志力於善歲暮爲粥食餓
者並施茶藥衣袴歷三十年不倦咸豐丙辰大祲免租

倡賑全活無算

耆壽

蔣宏學彭家灘人壽百歲咸豐六年題奉

恩旨賞給銀緞並昇平人瑞四字建坊

吳國禮馬塘人年百歲子士俊孫長興曾孫裕奎元孫松

濤五世一堂同治九年知縣周際霖詳請彙題奉

旨賞給銀兩緞疋

朱元利湯家園人年八十一子學舉孫龍舒曾孫承宗元

孫桂保五世一堂道光十八年知縣范仕義詳表其間

徐惟周康家莊人年九十生五子長鳴瑀孫起翔曾孫天

和元孫國恒五世一堂道光二十年知縣孫炳煒詳表

其間

秦永茂馬塘人年九十四子士高孫學周曾孫天祿元孫元瑞五世一堂咸豐元年知縣馬雲鶴詳表其間

祝賡盛沈家莊農民年八十六子惟松孫鉉俊曾孫鏐安元孫長壽五世一堂咸豐三年知縣馬雲鶴給匾表其間

丁盛元立發橋農民年八十八子如鴻孫桂山曾孫懷玖元孫士忠五世一堂咸豐九年知縣上官夔詳請彙題奉

旨賞給匾額綴疋

楊春生南鄉農民年九十子貴玉孫學俊曾孫炳禮元孫祥泰五世一堂同治九年知縣周際霖詳請彙題奉

旨賞給匾額綴銀

楊懷秀東鄉農民年八十八子宏愛孫南珍曾孫東流元孫益保五世一堂同治九年知縣周際霖詳表其間

朱大鵬春字號圩民年八十一子順元孫明遠曾孫羣臣元孫八一五世一堂同治九年知縣周際霖詳表其間

于啟明字毓潮現年八十八子逢春孫士文曾孫維吉元孫允元五世一堂同治十一年知縣周際霖詳奉

恩旨准給銀兩綵緞昇平人瑞額

徐廣富馬塘人年九十三子學華孫錦昌曾孫長發元孫福元五世一堂

陸錦春古河頭農民年八十一子兆麟孫德仁曾孫春宣

元孫彭庚五世一堂

馬國楠壽九十九

陳煥若壽九十九

邵如明壽九十八

馬芬字香傳壽九十六弟菑監生年踰八十兄弟友愛有

姜家大被風

洪尊三壽九十五

陳金兆字卜祥監生修橋梁設義塚施棺槥鄉人德焉壽

九十四子鵬圖

朱耀先字瑤仙壽九十四

黃天青壽九十三

張麟秀壽九十三

王錡壽九十三

劉啟瑞字芝庭增生三廨房薦事親色養工詩畫精岐黃

壽九十三四世一堂

周鸞字若梁太學生壽九十三廨 恩賜妻沈氏壽八十

四張小浦宗師贈額曰堂蔭椿萱子孫林立

王來松壽九十二

羅惟樂字養田樂善好施壽九十一

卞成章壽九十

繆裕齡壽九十

許正吉字兆興貢生壽八十九

冒美字東美監生歲歉鄰有斷炊者慨然出穀麥給之壽八十八子三章于門霖皆入成均

徐金門以子長清誥贈武德騎尉壽八十八

譚象春字紹芳國學生少習舉業屢試不售壽八十八

呂璣字衡軒庠生壽八十八

馬爲兌字中孚壽八十八

王紫袍壽八十八

胡萱生字春巖香山侍御曾孫肄業成均十試南北闈不售歸隱古柏園陳芝眉宮保題其却聘圖曰密雲不雨邑中公事皆竭力襄贊以城工議叙縣丞壽八十七著有遊吳集宿攝山幽居詩云危峰猶未到幽室暫相留

暮雨沈千樹羣山裏一樓清鐘驚鶴夢古佛笑人愁欲訪南朝事蒲團話白頭

馬金鐸字柿亭庠生精篆隸著有柿亭存草四卷以詠杏花春到江南雨亦紅之句爲沈觀察濤所賞壽八十七秦文達字雅度壽八十七子璠壽八十八瑞壽八十四孫樹國學生壽七十八

許國選國學生壽八十七

薛璠字望若讓產於兄壽八十七長子雲彪壽八十六次雲松壽九十四三雲鴻壽七十七

朱憲字同甫號柳塘居元興鎮陝西朝邑縣主簿清淞次子少失怙事母孝年十九負笈入都肄業成均援例籤

分四川試用布經因兄琳逝堂上侍奉無人告假回里
優游林下數十年視富貴澹如也道光十五年歲大荒
獨出千緡賑恤饑民全活無算咸豐六年旱蝗爲災復
助千緡民竈賴以安晚年因江南失守籌餉願諸子曰
吾家世受國恩當此軍需告急宜毀家紓難圖報萬
一諸子皆首先倡捐助餉不下數萬金之多大吏達於
朝賞給藍翎知府銜壽八十六妻顧氏亦壽逾七旬
白髮齊眉孫曾繞膝里中推爲古橋一人謂有是德宜
有是福也

李春榮字茂生好善樂施壽八十六

許灼華字日桃國學生壽八十六

許長棟監生壽八十六

陳義成壽八十六

林玉屏壽八十六

章可榮字清選監生遇有橋梁梵宇及負無以斂者欣然
樂施壽八十五

王玉墀庠生成豐戊午重遊泮水學使李給鬻官耆瑞額
壽八十五

冒杏溪字泗良職監生性剛直持家嚴肅教子孫有法紀
壽八十五妻石氏壽八十二子鳴歲貢生孫蘭如庠生
姚瀛字洲士庠生壽八十五

許日雄監生壽八十五

沈全翀字凌青壽八十五

紀霖字甘池世居柴灣鎮工岐黃壽八十四

楊德溥字松嵐善奕壽八十四

陳松字步青好善舉壽八十四

劉春華字藹亭豐利場諸生同治庚午重遊泮水壽八十

四子之晉庠生

劉德場字麗康國學生居豐利場歲歉出資助賑並施糶

數百具族戚間貧困者竭力周濟壽八十四長子邦榮

國學生早逝次子邦慶候銓從九壽七十六

秦榕子樹南國學生事繼母以孝聞壽八十四

冒健字偉也武生嘉慶間創宗祠於東陳鎮壽八十四

許根字愛棠國學生壽八十四

李大椿字香甫壽八十四

丁之道字程禹壽八十四

周經壽八十四

冒錦堂壽八十四

吳若慶字瑞雲好善舉曾於迎駕巷出已貲購石鋪地兩

次壽八十三子天成天申天爵天祿天如孫昭祺浙江

試用從九

宋敦山字仰三好義舉壽八十三

朱會麟字瑞兆性孝友居鄉謹厚儉樸可風晚年精神矍

鑠無異少壯壽八十三子柏浙江試用府稅課大使孫

芬庠生

姚世芳字晚蘭庠生壽八十三

楊錕監生壽八十三

徐名標壽八十三子璧監生孫湘庠生

吳疆字西書庠生遊庠後湖北學使徐淪莊先生聘入幕

論文甚歡回里教授工書法士林寶之壽八十二子廷

榕庠生

管樸字美中廩貢生為文力追先正壽八十二子三長廩

力學逝次鼇候銓州同三鳴候銓理問

陳先庚字秋槎庠生事親孝能詞賦晚好菊繁英盈畦與

客觴詠其中翛然自得壽八十二子清渠附貢生清華

早逝婦繆氏守節撫孤

管慎煥字瑤岑壽八十三子乃廩字友萃從九性孝友壽

八十一孫儉安儉成監生

張彭書監生樂施賑荒壽八十二教諭陳夔齡贈松柏長

春額

陳東字西林監生歲歉倡賑壽八十二子堯佐

張家樂字性餘常賑貧乏壽八十二

石志嵩字維嶽監生豐利人孝義性成離使俞諭辦賑捐

倡首出貲壽八十二子榮監生精岐黃

趙岐山職員精醫壽八十二

陳蔚字茂林附貢生壽八十二弟英字俊干監生壽七十

九事親極孝兄弟友愛一堂媿睦儼有古風
管泉字蒙山邑庠生壽八十二妻黃氏壽九十

唐萬高壽八十二

嚴中英字觀華多義舉壽八十一

鄧榮台字勝持國學生候選布政司理問性誠樸與物無

忤壽八十一

戴良玉字守和從九職銜生平敬師重友睦和鄉黨公事

皆勉力勤助壽八十一

俞正權字國衡候選縣尉壽八十一

王清源監生壽八十一

徐優學候選從九壽八十一

范鶴字卜成壽八十一

吳若尋字秉均壽八十一

許百圃壽八十一

劉瀛字曉山文生以課徒爲業好吟詠與詩人徐珠倡詩

社於畫雨樓年八十餘重遊泮水子青照文生

吳介仁馬塘人壽八十餘孫曾林立

瞿和勳字楠圃附貢生父湘琴官浙江勳隨侍潛心金穀

學佐沛縣鄭令幕值滑縣之變助守城有功上遊重之

多厚禮延聘者有小半繭詩集尤精墨蹟山水壽八十

子桂堂監生樹堂議叙孫依鑾

張志碩字菊癡從九銜怡情花竹於宅後構園植牡丹芍

藥數百本花時爛漫軒車闕咽令人想洛下廣陵之盛
邑令范仕義額其園曰藝芍倡建文昌祠於本村施田
奉香火暇則扶杖花陰聽讀書聲怡怡自樂壽八十
管慎安字貞吉庠生事親孝壽八十子乃臧從九壽亦八
十孫鏢監生

王鉅字繼封國學生工書善詩尤精於奕壽八十

章步蟾字雲路捐職從九性敦樸以謙謹聞壽八十子鴻

鈞候銓州同

秦榮字戟門庠生壽八十弟杏年八十九柱年八十四

宋殿華字廷瑞監生壽八十

秦光前字厚齋監生壽八十

許長楹監生壽八十

葛長清監生壽八十

徐瑞彩壽八十

徐萬鍾從九現年八十三

李箴字肇篁援例州吏目性孤冷好潔茗碗爐香清談對
客雖溽暑時灑然如秋壽七十九

徐延佐監生壽七十九子亡媳守節孫鑑從九

石曜章字彩文性孝母壽九十四曜章奉養無倦色壽七
十九

陳佩芬字澧蘭諸生性端厚動必以禮家故寒素讀書課
徒終身未嘗有過行壽七十九

黃長慶字錫繁性孝友父病刲股以進壽七十九子廷福庠生

范榕字壽寰庠生著有窗下詩存一卷讀史心得一卷煮糜掩骼利濟存沒壽七十八子溥瀚

羅煜字霽峰國學生工書畫晚年蒔花種竹自娛著養花錄二卷壽七十八

許德鴻字天衢庠生壽七十八
曹翼文字麗明國學生見義必爲貸親族之乏不責其償

道光甲午歲饑有二幼孩遺於路翼文留養之稍長乞人爲螟蛉子壽七十六

王清瑞字雪齋內貢生道光壬辰甲午捐資助賑著雪齋

詩鈔壽七十六

王萱字慕堂國學生精岐黃事親色養親沒遂絕意進取壽七十六子瑞珊孫廣榮庠生

汪桂林字鳳巢庠生少穎異工詩名流過海上者唱酬無虛日有半江詩鈔壽七十六

范顯榮字戟門庠生壽七十六
袁麟壽七十六

許大椿字肩雲性孝友工書刊刻忠愍公遺文著有陞餘集壽七十五

曹聯甲字瀛洲族有不能婚嫁喪葬者傾囊攸助捐賑助餉慷慨不吝壽七十五

女身果續志 卷九
袁鵬監生壽七十五

史西庚字星白增貢生弱冠以詩賦受知於朱虹舫先生
遊庠修幹宏音丰儀甚偉 聖廟春秋丁祭西庚爲相
者數十年晚年與同學馬如琳黃金傳輩聯耆英會飲
酒賦詩亦士林之碩果也壽七十四

陳曉春字旭齋庠生居潮橋勤於教授成就者衆壽七十
三子二鈞錫皆例貢生以孫洙捐贈武德佐騎尉

張興紳監生施棺賑貧壽七十三

奈廷楨字維周善岐黃壽七十三次子瑤世其業現年七
十六

許鳳儀字宙春國學生歲饑解囊無吝色壽七十二子宗

儒宗嶽孫其章

吳新畬字衡漳國學生襄督修城不辭勞瘁壽七十二

王兆荃字赤珊少失怙事母孝援例參藩好施與置義塚
施田助義學膏火壽逾七秩沒後崇川徐清惠公爲之
銘墓稱其一方推爲老成闔境賴以安堵鄉黨事無鉅
細得荃片言是非立判可以知其爲人矣子俊浙江東
陽丞保陞知縣

謝錫桂字淮灣庠生善岐黃尤得龍樹眼論之祕生平迂
緩謹約不與人爭卒享大年子鳳池玉珩孫永慶福慶
鴻慶俱庠生

馬廷柱字安瀾武生性孝友父沒撫弟廷桂成立中辛巳

科武魁未幾桂卒復撫姪攀鳳視如已出後亦登庚子科武榜生平好施與修城濬河均踴躍助貲年逾七十卒長子文鏞有父風次子鵬孫應琛均武庠

羅家駒字蓮莊國學生耄而好學著霞軒詩集四書講義壽七十餘

許德淦字壽泉監生議敘六品職銜幼孤爲母請

旌建坊通岐黃尤精喉科壽七十一子維中庠生

朱文年樂善不倦壽七十一

趙學禮現年九十二

嚴紹福字介之國學生 覃恩疊膺粟帛篤志好學課徒及子卜居縣北胡家樓現年九十一弟瀛字石逸太常

寺博士陞銜候銓教諭附貢生三品 封典現年七十

八祖居嚴家灣宅有古槐一株數百年物築槐蔭居數椽以娛老焉

許萬有現年九十

周春林現年九十

張大鶴現年八十九

儲九和字禮用現年八十八

葛發元現年八十八

葛士信現年八十八

郝齡昆字耀山從九現年八十六

叢乃玕現年八十六

朱霖字霽橋藍翎太常寺典簿附貢生同治癸酉重遊泮

水彭味之學使贈芹藻重馨額現年八十四

鄧映魁字衡杓監生現年八十四

顧鶴樓字登黃現年八十四

張家榮字世昌現年八十四

張仁壽現年八十四

許德漣現年八十三

程翥字鶴莊道光庚子 恩科舉人就職翰林院典簿同

治庚午重遊泮水學使童給黌宮碩望額現年八十二

管乃榮監生現年八十二

顧東明現年八十二

蘇永達現年八十二

陳文彬字墨莊現年八十一

陳鳳年現年八十一

馮永如現年八十一

陳嵩山現年八十兩膺粟帛子駿廩生

周學勤字希顏現年八十兩膺粟帛子雲鶴雲鶴監生雲

鵬增生

陳尙禮字立堂國學生現年八十

陳俊謨現年八十

杜雨峰現年八十

宗金樹字友石歲貢生選新陽縣訓導現年七十九

丁久定字震澤從九衛現年七十八

孫景程字蘭浦現年七十七

王大瑞馬塘人父病割左手無名指尖和藥以進父疾得

痊現年七十六

顧有德字勝奎從九衛現年七十六

陸壽齡字龍光現年七十六

張文秀監生現年七十五

戚松年字筠圃掘港本營外委現年七十四

袁侗字人舟現年七十四

繆蘭亭監生工岐黃現年七十二

劉柏堂現年七十二

方技

冒冠德字聖農性放達不羈高談雄辯能驚四筵少時客金陵嘗出橐中金石四方名士會於秦淮徵妓張樂爲平原十日飲詩歌盈篋論者謂南朝佳麗二百年來無此豪舉後官豫以疎脫獲罪久之得歸高臥水繪園時於花前月下與三五少年爭工塗抹興致不少減尤善畫梅興到時解衣盤礴天矯偃蹇姿態橫生晚年益落拓日畫梅數幅令老婢賣以自給市人亦弗知寶貴矣程曾祺字芳竹庠生喜青烏家言博覽精研遂工其術臬邑南帶江東濱海廣袤數百里筍輿迎迓遊歷殆徧然神解超脫不泥古法嘗謂地理以天理爲主此語的當

不易晚年尤矍鑠

聖廟春秋祭祀祺服青衿屹然立諸生班首人共目為魯靈

光年八十餘卒

黃學圮字楚橋工詩善書尤善鐵筆渾古蒼勁得籀斯遺
 意交遊多四方名士陶雲汀宮保總督江南時極器重
 之所作歷朝史印大興朱文正公為之序已載楊志沒
 後邑人胡連耀輓以詩云積雪虛簷夜有光忽驚遺老
 返雲鄉殘碑誰墮千秋淚短褐難禁兩鬢霜鷺鶴依人
 猶蹇傲孤松閱世耐炎涼城東便是西州路策馬頻來
 弔夕陽幕府當年列客星華胥一夢已全醒無雙白壁
 鐫名士有盡黃金付小伶乞米作書成寶墨典衣沽酒

臥空瓶淵明責子詩休賦餐菊何堪慰暮齡江淹遺宅
 鎖寒鴉寂寞屏梅白着花舊雨幾人悲宿草荒煙他日
 屬誰家茗華小字薦紅印風月殘詩冷碧紗忍憶元亭
 攜酒宅古苔篆壁室盤蝸高誼曾聞貫白雲素車心事
 薄塵紛黃山吳叔子客死如皋先生歛資葬之穀人先
 生題叔子遺畫贈之云素車白馬風逾古流水
 浮雲夢儻還日日看山看
 不厭多君風義重於山
 京口劉鶴
 詩碣留題待使君碩果如公餘幾在瓣香悔
 我未先焚他時儻問逋仙蹟杯茗來澆水畔墳

錢書江字達川工詩能文屢試不得志以丹青自娛嘗畫

秋山一幅蕭疎澹遠得元人筆意尤善著色長幘短燈

皴染數筆遠山蒼翠疑落襟袖間識者珍為文士之筆

陳煦字墨春職監生性好義邑中諸善舉皆竭力贊勸工書畫書逼近米南宮有摹刻十三行華山碑行世畫得大家法兼工琴棋與邑令范廉泉先生及沙增齡顧嵩壽輩飲酒賦詩著有題畫稿吳太史存義贈楹帖云入座半爲求畫客敲門俱是索書人可想見其風概矣壽八十四子寶卿監生性孝友慷慨好善力學早逝次鑄從九亦工畫善棋畫似惲南田得者寶之

黃勛字我石孝廉若沉子性豪爽善技擊兼工鐵筆尤善岐黃以濟世活人爲心嘗刊訂吳鞠通溫病條辨一書其序云醫事極難必消息天時人事之所以然採微於聲色氣味然後精參素問本草諸書庶幾古者疾醫之

掌遺事亦可想見其三折肱矣

范楚字去橋庠生能詩工畫花卉幕遊諸郡其墨蹟惜不多得

賈息贊字右田附貢生工岐黃或招之無寒暑雨雪必親往決生死良驗有欲傳其術者悉卻之曰是不可以語言授也野人每藏其方同病者食之輒愈

胡傑字雲溪少渡江得脈訣於其舅朱氏布衣遊江西幕歸遇盜江中持鐵如意擊之盜懼伏道光元年疫盛行增梓痧症全書賴以全活無算有貴人致之不以禮當暑衣葛衫往曰吾療疾豈干謁也診貧人予以藥好誦莊騷史漢書略嗜酒鼓琴拈鬚微吟格近范陸鮮與外

人唱和卒六十二

胡炳元字杏莊國學生幼聰慧習儒業兩戰不捷投筆歎曰吾懷濟世之心而志不遂命也遂棄儒就醫精脈訣前後活人無算年八十二卒子聯杓聯奎聯庚皆有聲醫序聯珠傳其業入成均

繆以芳字晴軒別號梅夫少孤事母孝工書善詩畫筆蕭疎有雲林意性廉靖嘗拾遺金候其人至還之沒後宗金樹為作梅夫處士傳

馬作楷字雲根國學生精岐黃每遇災疫活人無算壽七十妻石氏壽九十餘

嚴毅字杏村儒醫中倫子屢試不得志乃習醫遠近爭延

致之曹學師贈以保赤心誠額第遜字時敏國學生精堪輿命理卜相等術不輕語人每占一課悉奇中年四十精醫四方請者無虛日少嘗習儒見里中讀書子弟欽慕如不及年六十一卒孫憲章庠生毅子保善孫棠世其業

張盛璠字荆巖太學生少讀書精通岐黃道光十三年瘟疫時行活人甚眾邑令范仕義贈楹帖云奇技自敵山中相秘術人稱地上仙樂行善事至老不倦年六十四卒

符日純字粹如監生岐黃濟世不受饋遺子四政琳武生琨瑤登武榜

沈鳳鳴字斗山國學生精堪輿學著有堪輿輯要壽七十

五

陳鳳佐字鳴岐治病多奇中著傷寒論辨難經析疑

沈家燮字理菴文生精堪輿家言歲有所積輒以藥餌濟

人

任大樞字慎齋精幼科癸丑痧疹大行出奇技活兒無算

邑人贈保赤心誠額子宗漣宗俊國學生亦世其業

婁璫字希篋監生幼好博覽精岐黃邑人贈指到春回額

子桂字馨山傳其技而益精全活甚衆註內經二卷議

敘理問銜

吳壽民字根培庠生工詩詞以畫蘭竹得名

范春柔字琴谷選拔范駒女參軍張金誥室也金誥作宦

數省范襄理內事有大家風暇則能詩詞工丹青山水

墨蘭尤擅長今猶有藏其墨蹟者

楊得春字柳門廩生秣陵人寓皋更名後工詩賦詩宗晚
唐賦善六朝體得徐庾哀豔尤善賞鑑金石文字嘗得
晉卞忠貞公玉印元衛國忠肅公銅印各為一詩以紀
之為人短小精悍論古事極博雅未幾卒於皋其思歸

寓賢

楊棨字羨門丹徒人道光乙酉選拔工詩賦賦得唐賢法
佳作可入黃御史集咸豐間避亂來皋皋邑碑銘誌序
多出其手刻有螻菴賦二卷詩二卷時過江名士多僑
寓皋棨與金陵楊樸菴長年楊柳門得春齊名一時有
二三楊之日棨尤純粹無習氣終日手不釋卷年七十餘
卒於皋

楊得春字柳門廩生秣陵人寓皋更名後工詩賦詩宗晚
唐賦善六朝體得徐庾哀豔尤善賞鑑金石文字嘗得
晉卞忠貞公玉印元衛國忠肅公銅印各為一詩以紀
之為人短小精悍論古事極博雅未幾卒於皋其思歸

菩薩蠻詞云天涯書劍飄零久鄉愁泥我濃於酒偏又
上扁舟扁舟多載愁歸來仍作客千里音書隔不若
早還家寒梅應有花

張步麟字書春恩貢生李壽彭字榕圃優貢生宿遷教
諭俱京江人咸豐間避亂來江北擁皋比於皋皋人士
多從之遊蓋不特其學可師其品亦足重云

徐鴻謨字若洲錢塘人官揚州府經廳咸豐間避兵來皋
工詩善畫尤精篆隸鼎彝敦鬲文一見輒辨真贋其配
鄭氏名蘭孫字娛清號蓮因室主人亦善詩畫作小詞
尤工有蓮因室詩詞三卷定慧寺題壁云欲息塵襟此
暫游上方風景足清幽慈悲佛現莊嚴相鐘鼓樓高梵

唱秋身世蒼茫憐寄跡年華倏忽等浮漚二分明月揚
州路回首雲山滿目愁東嶽廟題壁云梵宇清涼絕俗
塵凌虛樓閣幾由旬曉鐘聲徹白雲外夜月影澄秋水
濱欲悟真空參古佛願消災障證前因蛻餘留影天涯
客瀚海迷茫獨愴神明月生南浦詞云自憐憔悴低飛
翻宦海浮沈往事餘鴻迹西子湖邊芳草碧平山堂下
繁華易而今又作東皋客百感中來天地爲之窄祇
合逃禪聊自適藥爐經卷虛堂夕抑鬱不得志卒於皋
姚功立字麓橋泰興人工詩畫通六壬堪輿家言書法瘦
勁卒於皋

蔣金和字劍人寶山人佐幕來皋題水繪園云雉皋城頭

衰草霜天寒木葉飛空塘居人尙識冒家墅青青野菜
黃泥牆冒家奕葉聲華盛淮南甲第連雲峻先人風節
著三朝公子才名傾八俊中原烽火正黏天江表衣冠
尙宴然湖海每留豪士飲鶯花曾識太平年秦淮簫鼓
寒流水鐙紅酒綠悲歌起家運衰時國運終黨人銅後
才人死白頭老父返郊居敗紙零星刺血書松菊依然
鄉井在湖山無恙劫灰餘故園花木重蒐輯梵王宮枕
殘霞碧繡渚芙蓉秋水菴畫隄楊柳春風宅玉女蓮花
割數峰雕甍翠柱簇房權蝦簾畫捲文珠碧鳳蠟宵懸
火齊紅媼娥二八青娥侍徵歌選藝聯朋輩擁帚能爲
陶穀姬吟詩便是康成婢陳郎才調太流離少日青衫

一卷詞解使阿雲慰岑寂癡情兒女老夫知閉門從此
先生老悽涼忍復談天寶風月重逢全盛時煙雲仍畫
飄零稿八年棋局小滄桑易主園林意暗傷香火緣深
留破衲雲鬢影散賸空牀匿峰廬下苔花綠舊巢不認
門前樸南郡悲風種白楊西田暮雨哀黃菊君不見詠
懷堂廢夕陽幽燕子春鐙瑟部愁莫唱影梅菴樂府月
明孤鶴海西頭題邑令范廉泉先生補水繪園修禊圖
云夕陽喬木古樓臺滿縣清風使節陪春水綠搖天上
去野花紅入寺門來雲煙過眼人千載魚鳥忘情酒一
杯不是先生誰地主名園指點畫圖開往日春風盛綺
羅哀絲豪竹不堪歌染香樓外疎疎月洗鉢池頭瑟瑟

波裙履易愁公子老江山如夢美人多影梅憶語悽涼

甚南渡煙花更若何十首新辭和阮亭東南壇坫重前

型采蘭節過剛生日是日為巢修禊人來又客星螺子

墨榮雙篆碧楊花風起一鷗青香林妙隱知何處誰薦

汀洲杜若馨敢說迦陵有後身扁舟作客歲逢申陳其

計以丙申歲江湖感遇存知己和以水繪園香火留題

來此王旨氏證宿因細雨斜風一懷古鶯飛草長獨尋春此圖此地

堪今昔手搦蘭亭定武真

李炳元字亭午靜海籍庠生文品高卓晚號味梅居士以

書畫名家長子新曜字奎垣六歲通尚書嘗夜私起映

月色讀書家人駭之甫冠遊庠旋食餼貢成均次子新

泉字井香亦舉明經善詩賦旁通周髀風角堪輿醫卜
等術諸孫皆讀書世其家

李新林字蓮溪靜海籍居皋嘉慶丁卯登賢書道光丙戌

大挑一等歷官河南鄭縣正陽知縣署直隸汝州知州

充丁亥提調官戊子同考官被議落職邑人題愛士養

民額頌焉家居修文業授生徒誨子姪多所成就壽七

十八子祖輝增生孫映庚文生

唐持平字木安湖南人少登賢書謁選當得官久之厭棄

去養靜於金陵古龍菴咸豐癸丑避亂來皋通曉經義

兼釋典與遊多名士乙丑二月卒於雨香菴年七十八

葬西門外八里許海雲菴後汪受天立石表墓

方昭文字蘊山安徽太平縣人舉孝廉方正本籍率勇禦賊殉難

旌表從祀昭忠祠世襲雲騎尉詩學宏通寓皋有十詠賈大夫祠云大夫饗祀有祠堂御以如皋說此方附會或言憑射雉英靈竟自著驅蝗遺風麥隴遊春樂韻事蘭閨索笑忙詩首關雎爲起化何妨留迹在江鄉范公隄云築得隄長亘似虹西溪監稅昔興工仔肩任自擔天下出手瀾先障海東數代制遵修堰固三州利饗煮鹽豐也同微禹其魚感民到于今說范公王龍圖祠墓云荒祠舊額紀龍圖一片蒼涼客感吁抗疏生前卿相忌守塋死後子孫無天心或忘忠良報世道終須正直扶風

勸昔逢梁令尹曾爲封築翦榛蕪平倭塚云西場京觀客經過嘉靖時聞賊熾倭不少帥師揚虎節此先力戰息鯨波從來養寇滋難滅苟善將兵不在多邱也參戎劉副使海氛迅掃止干戈


李聯珠字鐵航蘇州人避亂來皋寓林梓鎮沈氏培園題培園詩云已幸生全劫外身流離翻聚一家春能令盡室倉皇定始信交情患難真廿載雪鴻尋舊約雙棲梁燕結新鄰羯來更有便宜事日日看花替主人喜見羣芳處處栽穿籬繞逕總樓臺陰晴天有寒暄意富貴花偏冷澹開託足同歌招隱賦賞心終是不凡材主人也怕青春去自把金尊秉燭來一綫春潮綠過江又添新

水上漁樵誰家尺素魚鱗六滿地落紅燕子雙慘澹風
光懷故里氤氳花氣入山窗不知今夜秦淮月可照將
軍築受降困人天氣薄陰時萬柳籠煙織雨絲滴露曉
舍花有淚過江春去鳥先知溼風吹綠生苔礎病樹殘
紅落酒卮如此華年凋急景壯心摧斷幾莖髭南風日
日競清和慘綠愁紅滿眼過曲譜乍翻新水合家山猶
念舊關河親朋消息天邊少人海奇緣亂後多結得鷗
盟好兄弟變名吾欲署煙波閒來何苦再耽吟我亦因
人百感侵舐鼎看昇雞犬去括囊都作鳳鸞瘖聊隨短
褐胡盧樣誰識長鏡寄託心只有思親魂夢遠暮雲隔
斷北堂深

岑建功字紹周甘泉人客舉時育嬰堂撫幼塾無不踴躍
輸將年饑施米施衣施藥于淦字秋齡克承先志

王興明字月秋儀徵人幼失怙恃舉邑團練興明應募精
勤謹慎以人材薦入撫標積功至總鎮銜 賞戴花翎
後隨總統郭防堵河南張家口遇賊殉難

沈懋字采石邑令沈西雛先生姊工畫善詩嘗居舉題水
繪園云一代騷壇主千秋廢苑存蒼煙澹喬木荒月照
詩魂勝地真難狀寒泉薦子孫卽今圖畫裏負郭不成
村



								<p>李襲以字勝風甘泉人客舉初育嬰堂時似操無不親觀</p>
--	--	--	--	--	--	--	--	-------------------------------

